

DAYON MIABOT SI JESUS UG NAGTAWAG



San Juan, sa ika-11 nga kapitulo, sugod sa ika-18 nga bersekulo, gusto kong basahon.

Karon ang Betania haduol sa Jerusalem, nga may tulo ka kilometro:

Ug daghan sa mga Judio ang nanganhi sa paglipay kang Marta ug kang Maria, mahatungod sa ilang igsoon.

Unya si Marta, sa pagkadungog niya nga si Jesus nagapaingon nganhi, miadto ug misugat kaniya: apan si Maria nagpabilin nga naglingkod sa balay.

Unya si Marta miingon kang Jesus, Ginoo, kon dinhi ka pa niadtong tungora unta, wala unta mamatay ang akong igsoon.

Apan ako nahibalo, bisan karon, bisan unsa man ang imong pangayoon...sa Dios, kini igahatag kanimo sa Dios.

Si Jesus miingon kaniya, Ang imong igsoon mabanhaw.

Si Marta mitubag kaniya, ako nahibalo nga siya mabanhaw sa pagpamanhaw unya sa kaulahian nga adlaw.

Si Jesus miingon kaniya, Ako mao ang pagkabanhaw, ug...kinabuhi: ang nagatoo kanako, bisan siya namatay, mabuhi siya:

Ug ang tanan nga buhi ug nagatoo kanako dili na gayud mamatay. Nagatoo ka ba niini?

Siya miingon kaniya, Oo, Ginoo: ako nagatoo nga ikaw mao ang Cristo, ang Anak sa Dios, nga moanhi sa kalibutan. (Ug bantayi kana!)

Ug sa nakasulti na siya niini, siya miadto, ug gitawag sa tago si Maria nga iyang igsoon, miingon, Ang Magtutudlo ania dinhi, ug nagatawag kanimo.

² Mag-ampo kita. Langitnong Amahan, pamatud-i kana nga mga Pulong sa among mga kasingkasing, karong gabhiona, samtang magahulat kami Kanimo karon. Ang Imong Pulong, ang Imong alagad, ug ang maong teksto, gikatugyan tanan nganha Kanimo, sa Ngalan ni Jesus Cristo. Amen.

Makapanglingkod na kamo.

3 Ang akong katuyoan sa pag-anhi dinhi maoy sa pagtinguha nga matabangan ang mga katawhan sa Dios. Dili tungod lang aron iampo, ug pandongan ang mga masakiton, kondili aron nga maila nila si Jesus Cristo sa atong taliwala, ang Anak sa Dios sa atong taliwala. Magahisgot kita karong gabhiona sa niining hilisgotanan: *Dayon Miabot Si Jesus Ug Nagtawag.*

4 Karon bahin niining panahon nga atong ginahisgotan, usa kadto ka masubo kaayo nga panahon kaniadto. Kung nabasa n'yo na ang estorya sa kinabuhi sa atong Ginoo, masayran nato nga usa Siya ka suud nga Higala sa niining batan-on, nga si Lazaro. Siya kaniadto. . . Human sa pagtaliwan ni Jose, o, mibiya Siya ug nanimuyo kauban sila Marta, Maria ug Lazaro. Ug suud sila nga managhigala. Aduna sila'y. . . Mora Siya og pastor nila, usa—usa ka tinuod nga Higala. Ug gihimoan nila Siya og pipila ka sinina nga maisul-ob, kupo nga maisul-ob, sa pagtoo ko, ginaingon nila, ug lunlon kadto hinabol nga walay tinahian. Ug dayon naghimo sila og mga butang para Kaniya, tungod kay mitoo sila Kaniya. Kadto ilang—mitoo sila ug nakita nila kadto. Mihawa sila sa ilang simbahan, ug ang uban pa, aron mosunod Kaniya. Ug grabe kadto nga butang niadtong panahona, nga mamahimong kamatayon ang silot niini, ang—ang paghawa gikan niini.

5 Apan, si Jesus, kining Lalaki nga nagalibot-libot sa ginaingon na nila, nga ginabungkag ang ilang mga kasimbahanan, ug nagasulti kono og dautang butang mahitungod sa ilang pari, ug—ug uban pa, Siya—naghimo kono Siya og dakung kadaut kanila, sa pagdahum nila. Ug—ug bisan gani ang pag-ila lang Kaniya mamahimong—papahawaon ka na sa mga sinagoga. Ug pagnapagawas ka na sa iglesia, sa ila—nagdahum sila nga wala ka na—wala ka na kono og kahigayonan aron matubos. Kung dili ka miyembro sa usa sa ilang sekta, sama sa Fariseo, Saduceo, o sa kung unsa man, wala kono og katubsanan kung anaa ka sa gawas niana. Ug tungod kono nga anaa sila'y katungod, anaa sila'y mga yawi, ug mahimo ka kono nilang sipaon pagawas kung gustohon nila. Ila kanang kinaugalingon nga sinultihan. Dili ikatingala nga si Jesus miingon, “Kamo, tungod sa inyong tradisyon, inyong gipakawala'y pulos ang Pulong sa Dios.” Kita n'yo?

6 Ug karon nahitabo kini pag-usab, tungod kay nahibalo kitang tanan nga kanunay'ng ginapahitabo og utro sa kasaysayan ang kaugalingon niini. Ug kini—subo kini nga isulti, apan kini gipropesiya na nga mahitabo pag-usab, ug nahitabo gayud kini pag-usab.

Nahibaloan nato nga dili kaniadto maayo ang pagkaila kang Jesus.

7 Sa makadaghang higayon, gustong hukman sa mga tawo ang tawo nga dili mouyon kanila. Dili gayud nato angay'ng

buhaton kana. Mahimong dili kita magkauyon sa usa'g usa, apan mahigalaon sa gihapon. Kung dili ko man mahimong mouyon sa usa ka tawo, ug nga sa gihapon higugmaon siya ug iampo siya, ug ang dili ko pag-uyon kaniya. . . kaniya nakabase man sa Kasulatan, ug alang man sa mas maayo nga kapadayagan, nan dili na ako mosulti og unsa man nga dili-maayo ngadto kaniya. Sa kanunay kong dili pag-uyon kaniya, gusto kong magmahigalaon, tungod kay gihigugma ko siya, ug ako—sa pagkatinuod dili ko gustong malaglag siya. Ug ingon niana usab ang angay nga buhaton niya kanako; dili nato gusto nga malaglag. Ug angay namong ibasi ang among mga hunahuna sa kung unsa ang ginaingon sa Pulong. Ang Pulong mao ang mamahimong Kamatuoran. Dili ang among kredo o kung unsa ang among mga panghunahuna, kondili kung unsa ang ginaingon Niya; wala og unsa man nga kinaugalingon nga paghubad, mao lang gayud kung unsa ang giingon sa Pulong.

⁸ Niadtong miaging gabii, may nabuhat ako ug daw sa halos panamastamas na kadto, sa pagtoo ko sa usa kadto ka pangministrong pagpamahaw niadtong miaging buntag. Gipahimutang ko si Jesus diha sa usa ka pagbista. Miingon ko, “Sama sa gibuhat nila kaniadto, mao usab ang ginabuhat nila sa karon.” Maayo tingali kung ako kining isulti pag-usab sa makadiyut lang, kung aduna pa kita og oras. Karon, ingon ko, karon nahibaloan nato nga . . .

⁹ Sa repormasyon ni Luther, iyang, sa kaniadto nga panahon, siya miingon nga mabuhi ang matarung pinaagi sa pagtoo. “Ang tawo nga nagatoo kaniadto, siya mao ang nakadawat Niini.” Apan nahibaloan nato nga daghan kanila ang miingon nga sila mitoo, ug wala man nakadawat Niini.

¹⁰ Sa panahon ni—ni John Wesley, kung naangkon nila ang ikaduhang panalangin, gitawag nila kini og pagpakabalaan, bug-os nga pagpakabalaan, nanagkalipay sila ug nanagsinggit. “Ang tanan nga nanagsinggit, nakadawat Niini.” Apan nasayran nila nga wala nila naangkon Kini. Daghan kanila ang nanagsinggit, ug wala man nakadawat Niini.

¹¹ Niadtong panahon sa Pentecostes, miingon sila, “Karon miabot na ang pagpanag-uli sa mga gasa, ang bautismo sa Espiritu. Siya nga nagapanulti'g mga dila, nakadawat na Niini.” Nahibaloan nato nga daghang nanagpanulti'g mga dila, ug wala nakadawat man Niini.

¹² Busa ginaingon nila, “Bueno, ang bunga kini sa Espiritu, ingon niana kung unsa Kini.” Oh, dili, dili ang bunga sa Espiritu. Aduna niana ang Christian Science, kon diin halos. . . Ang gugma bunga sa Espiritu. Kung ingon niana, ug aduna sila og labaw pa nga gugma kay sa ni bisan kinsa, ug ginasalikway man ang pagka-Dios ni Jesus Cristo; ginatawag lang Siya nga usa

ka propeta, usa lang ka ordinaryong tawo. Kita n'yo? Busa dili ingon niana kini.

¹³ Tugoti ninyong susihon ko lang kana sa makadiyut. Dalhon nato si Jesus diha sa usa ka pagbista. Ug pasayloon ako sa Dios tungod sa niining pamahayag, gikan sa entablado, apan himoon kong dili usa modapig Kaniya sa pipila ka minuto, aron lang dalhon kamo ngadto sa Kahayag. Kita n'yo?

¹⁴ “Karon ginapaanhi ko kamong mga tawo karong gabhiona; nagapakigsulti ako kaninyo. Atua ako kaniadto sa usa pang panahon niadtong dinhi pa sa yuta si Jesus nga taga-Nazareth. Nagaanhi ako kaninyo, ug aron mangatarungan kaninyo batok niining tawo, nga si Jesus nga taga-Nazareth. Karon nasayod kitang tanan nga ang Dios gugma. Ang Biblia nagaingon nga ingon niana Siya. Sige, ug ang gugma, ang Espiritu mao ang pagkamapuanguron, pagkamaayo, pagpailub, kaaghop, ug uban pa, ug gugma. Karon ginaingon ko, may butang nga gusto kong ipangutana kaninyo. Ipananglitan nato ang kung unsa—kung unsa ang nasayran natong, ingon nga Cristohanon.

¹⁵ “Tan-awa kining inyong tigulang nga pari. Ang iyang kaapo-apo-apo-apan usa ka pari kaniadto pa. Kinahanglan maipanganak siya sa nianang kaliwatan sa mga Levita, aron nga mamahimong usa ka pari. Nahibaloan nato, karon, wala siya nakasinati sa kinabuhi nga iya sa usa ka batan-ong lalaki nga pareho sa nasinati sa uban kaninyo. Unsa’y ginabuhat niya? Ginasakripisyo niya ang iyang kaugalingon, atua siya didto aron tun-an ang Pulong, ang Pulong sa Dios. Ginasusi niya kini, adlaw ug gabii, adlaw ug gabii, kinahanglan mahibaloan niya ang matag letra niini, matag pulong sa basahong-linukot. Kinahanglan nga kinasingkasing niyang mahibaloan kini. Iyang—iyang, may sa kung unsang butang bahin niini nga kinahanglan niyang mahibaloan.

¹⁶ “Ug dayon, gawas pa niana, sa dihang gikasal ang inyong amahan ug inahan, kinsa man ang naghiusa kanila ingon nga bana ug asawa? Ang inyong diosnong tigulang nga pari. Kinsa man ang miduol sa inyong amahan sa dihang anaa siya sa panginahanglan ug nakapangutang siya og salapi tungod sa iyang umahan, nga pagakuhaon na unta kini sa mga gikaprendahan? Kinsa man ang nagbarug uban kaniya? Ang inyong buutang tigulang nga pari. Kinsa man ang miunong sa inyong inahan didto sa maong lawak niadtong gipanganak kamo sa inyong inahan? Ang buutang tigulang nga pari. Kinsa man ang miduol kaninyo sa dihang kamo nagmasakiton ug nanginahanglan? Ang inyong buutang tigulang nga pari. Kinsa man ang nagpanalangin kaninyo ug nagtugyan kaninyo ngadto sa Dios, ug nagcircuncida kaninyo sa ikawalo ka adlaw? Ang inyong buutang tigulang nga pari. Sa dihang hapit na magbulag ang inyong amahan ug inahan, kinsa man ang nagpahiusa’g balik kanila, nagpapabilin kanila maghiusa? Ang

inyong buutang tigulang nga pari. Pag adunay problema sa silingan, kinsa man ang naghusay niini? Ang inyong buutang tigulang nga pari. Mao gyud.

17 “Karon nasayod kining buutang tigulang nga pari nga ginaingon sa Biblia nga gikinahanglan sa Dios ang usa ka carnero ingon nga usa ka halad. Daghan kaninyo nga mga kalalaken-an ang negosyante, busa wala kamo nagapamuhi og carnero, pero nagkinahanglan man ang Dios og usa ka carnero. Mao nga naghimo sila og mga tangkal sa mananap didto, nanagbaligya sila og mga carnero aron ang—ang mga negosyante makaadto didto ug makapalit niini, aron maghalad og usa ka halad para sa ilang kalag, nga gikinahanglan sa Dios.

18 “Unsa man ang ginabuhat niining batan-ong lalaki, nga gitawag og Jesus? Asa man siya gikan? Aduna kono nag-ingon nga siya natawo, sa usa ka ulay. Kinsa ba ang nakadungog na sa ingon-nianang tinonto nga butang? Nahibaloan nato nga ang iyang inahan nagsamkon na kaniya sa wala pa sila ni Jose naipanganak, o, sa wala pa sila ni Jose naikasal kaniadto, natawo na siya. Karon nahibaloan nato nga siya usa—dili na maayo ang iyang dungog, sa sugod pa lang.”

19 “Unsa bang membership card nga aduna siya? Kung diosnon man siya nga tawo, unsa man nga grupo ang iyang ginaapilan? Sa dihang ang inyong pari nagtuon, nagtuon, nagtuon, nagtuon, aron lang nga mahibaloan kana nga Pulong; dayon ania siya nagaabot, nga ginabungkag kung unsa ang gitukod na sa pari. Matawag ba ninyo kana nga ‘Dios’? Siguradong dili gayud.

20 “Karon, niadtong miagi lang nga adlaw, sa dihang gihimo sa inyong pari nianang lugara didto, ang . . . ug lugar kon diin kamo makapalit og panghalad, unsa ma’y gibuhat niining batan-ong lalaki? Pagkabuutan ba? Gipangbunalan niya, gipanghagkom ang pipila ka mga pisi, pipila ka lino ug mga panit, ug mitan-aw sa mga tawo, nga may kasuko; gipangsipa ang kadtong mga lamesa, ug gipangbunalan sila aron manggawas didto. Ug tawgon ninyo kana nga mga bunga sa Espiritu, nga ginatan-aw sila, nga may kasuko? Ug, tan-awa, gihikawan ang tawo sa iyang kahigayonan nga mosimba kang Jehovah! Gusto unta mosimba Kaniya ang negosyante; wala man siya nagapamuhi og mga karnero, ug miadto lang siya didto aron mopalit niini. Ug gipangbalintong Niya kini, ug gipangsipa sila, ug gipang-abog sila pagawas.”

21 Kinsa man dinha ang adunay bunga sa Espiritu? Kita n’yo? Tan-awa. Kita n’yo, dili bunga sa Espiritu, dili ang pagsulti’g mga dila, dili ang pagsinggit.

22 Moingon kamo, “Kung ingon-ana, Igsoong Branham, unsa man diay ang ebidensiya? Unsa gayud ang ebidensiya?” Ang pagpanghimatuod sa Pulong para sa maong takna.

23 Anaa na kanila kaniadto ang Biblia. Siya ang maoy eksakto gayud nga gisulti ni Jehovah nga mahitabo. Wala na kini magkinahanglan og unsa man nga paghubad. Hinubad na kini didto. Atua ang inyong mga pari, atua ang tanan nga aduna kanila, ug ang tanang uban pa nga naandan na gayud ug tanan na, apan sa gihapon nangapakyas sila nga makita ang Pulong. Ug gihimo Niya kadto nga Pulong ingon nga buhi alang niadto nga kapanahonan. Mao kadto ang ebidensiya niadtong kapanahonan.

24 Anaa kang Luther ang ebidensiya para sa iyang kapanahonan, si Wesley usab sa iyang kapanahonan, ang Pentecost usab sa kapanahonan niini, apan ania na kita sa usa na usab nga kapanahonan. Maayo man kadto nga mga butang. Apan sama sa usa ka masuso, adunay mga tudlo, dunay mga mata, ug ilong, apan paglabay sa pipila ka panahon kinahanglan niini nga mamahimo nang usa ka hingkod nga tawo. Kinahanglan niini nga mamahimong usa—usa ka hamtong na nga bata; human mahimugso, magkaaduna og kalag, lawas, espiritu, nakalihok-lihok na.

25 Karon nahibaloan nato nga, ang tanan niini, gipahayag kini ni Jesus diha sa pipila lamang. Kadto lamang mga gikatagana na Niyang daan ngadto sa Kinabuhi, ang nakakaplag Kaniya. Dili nga mga dinagkung panon; ang Iyang panon dili gayud mamahimong sama sa mga panon ni Caifas. Aba, mahimo ni Caifas kaniadto nga tawgon og tigumon ang tibuok nasud. Nagtawag is Jesus og pipila lamang. Dili daghan ang nakaila Kaniya. Linibo ka linibo na ka mga tawo, niadtong mianhi Siya sa yuta. Mianhi Siya sa yuta, ug wala man lang sila nasayod nga ania Siya.

26 Ingon niini usab ang magakahitabo! Magaanhi Siya alang sa kadtong mga tinawag ngadto sa Kinabuhi. Nasayod Siya kung kinsa kadtong mga tinawag ngadto sa Kinabuhi. Ug dili Niya . . . Buluhaton Niya nga atimanon kana.

27 Karon mahimatikdan nato nga mihawa sila sa simbahan niadtong panahona, ug gitooan nila Siya. Ang tanan-tanan nga ginaingon sa Pulong mahitungod Kaniya, atua Siya nga mao gayud.

28 Ug usa niana ka adlaw mibiya Siya sa ilang panimalay. Gusto kong maghisgot og tulo ka mga butang: mibiya si Jesus; miabot dayon ang kamatayon; ug ang tanan nga paglaum wala na. Gusto kong maghisgot bahin nianang tulo ka mga butang sulod sa pipila ka minuto.

29 Mibiya si Jesus. Ug sa diha nga mibiya Siya, miabot ang problema. Karon pagmobiya Siya, o mibiya sa inyong panimalay kon diin kamo nanimuyo, dinha na nagaabot ang problema. Aduna na'y abli nga pultahan si Satanas pagmobiya na si Jesus.

³⁰ Mibiya Siya, ug—ug sa pagbiya na Niya, misulod dayon ang kamatayon. Ug pagmogawas na gani si Jesus, magasulod ang kamatayon. Ang mahimulag gikan Kaniya maoy kamatayon, busa mosulod ang kamatayon pagmogawas na si Jesus.

³¹ Ug nag-ukoy-ukoy ang kamatayon dinha kang Lazarus. Ug dayon ang Maong ilang gitooan ug gihigugma, gipaadtoan nila Siya aron mouli og iampo si Lazarus, kay nakita nila Siya ug nahibalo nga hingsayran Niya ang Dios, nga kung unsa man ang isulti Niya sa Dios. . . gipahayag kini didto ni Marta, “Bisan unsay igasulti Mo sa Dios karon, tumanon kini sa Dios.” Iyang naila nga Siya ug ang Dios Usa ra. Siya ang Pulong sa maong takna, busa naila niya kadto. Ug nahibalo siya, nga kung makakonekta lang gyud unta siya diha Kaniya, apan mibiya na Siya ug dili nila Siya mahinabi. Ug gipaadtoan nila Siya, ug, imbis nga mopauli Siya, miadto hinoon Siya ngadto sa layo. Ug dayon gipaadtoan nila pag-usab, ug, imbis nga mopauli Siya, miadto hinoon Siya ngadto sa mas halayo pa.

³² Usahay mahibulong kita kon nganong nagakahitabo ang ingon nianang mga butang, apan dili ba nagaingon man ang Kasulatan nga, “Ang tanan nga mga butang masigtabang alang sa ikaayo niadtong mga nahigugma sa Dios”? Nasayod Siya kon unsay Iyang ginabuhat. Kung magalangay man Siya, sige lang. Nasayod Siya kon unsay Iyang ginabuhat. Aduna gayu’y katuyoan.

³³ Nahibaloan nato nga giingon Niya, sa San Juan 5:19, “Sa pagkamatuod, sa pagkamatuod, nagaingon Ako kaninyo, ang Anak walay mahimo sa Iyang kaugalingon, gawas sa Iyang makita nga ginabuhat sa Amahan.”

³⁴ Giingnan Siya sa Amahan nga mobiya, ug mipahilayo Siya sa ingon ka daghang mga adlaw. Sa diha nga natapos ang maong mga adlaw, dayon gisulti Niya kon unsay giingon Niya niadtong higayona, nga, “Ang atong higala nga si Lazaro natulog.”

Ug miingon Siya, “Bueno, okey ra siya.”

³⁵ Ingon Niya, “Patay na siya. Ug alang kaninyo gikalipay Ko nga ako wala didto.” Kay, nankingamot man sila nga mapaadto nila Siya ngadto kaniya, aron ayohon kini o igasulti kon unsay angay’ng pagabuhaton. Apan Siya nasayod kung unsay angay’ng pagabuhaton, busa gibuhat Niya lang eksakto kung unsa ang daan nang gisugo Kaniya nga pagabuhaton Niya: ang mopahilayo. Kung mahimatikdan ninyo Siya didto sa lubnganan sa pagbalik Niya. Gisulti Niya kana sa dihang nahibalik na Siya ug nakaplagan kini nga panimalay.

³⁶ Wala na gayu’y paglaum. Patay na si Lazaro. Sa matag oras, kanunay nilang mapamalandong, “Siya tingali moabot ra. Moabot ra gyud Siya tingali. Tingaling mobalik ra gyud Siya.” Sa katapusan, namatay siya, gibiyahan na siya og gininhawa.

37 Migawas sila, gipaembalsamar siya, nga gikuha ang dugo sa iyang lawas, giputos siya sa panapton nga lino, sa mga pahumot, ug naembalsamar na siya ug gipahimutang na siya didto sa lubnganan, gitungtungan og bato ang lubnganan, nga maoy ilang nabatasan sa paglubong niadtong mga panahona. Usa ka lungag sa yuta, nga tingali sa bato lamang, ug gitakpan og bato ang ibabaw niini, kana ang nabatasan nila kaniadto.

38 Milabay ang unang adlaw, milabay ang ikaduhang adlaw, milabay ang ikatulong adlaw, milabay ang ikaupat nga adlaw, nagkadugta na ang maong tawo didto sa lubnganan. Nahugno na siguro ang ilong niya. Nga, sa hunahuna ko mao kana’y unang butang nga madugta, ang ilong. Ug nadugta na gayud siya. Ang iyang—nagabalik na ang iyang unod ngadto sa abog, sa yuta, o nagabalik na. Upat na ka adlaw nga nagpanaw ang iyang kalag sa kon asa man, gikan kaniya.

39 Ang tanan-tanan nga paglaum nga makita pa siya pag-usab, sa niining kinabuhia, wala na. Ug dayon sa dihang wala na gayu’y paglaum. . . Naghulat sila kaniadto, “Tingali kung moabot ra Siya sa unang adlaw, sa ikaduhang adlaw!” Wala gayud. Dayon namatay na lang siya, ug wala gayud Siya miabot. Dayon miabot ang desperasyon.

40 Wala magdugay aduna siguro’y tawo nga nag-ingon kaniya, “Atua sa gawas ang Ginoo.” Ania dayon si Marta nga nagadagan diha sa dalan!

41 Miabot si Jesus sa mangiob nga takna sa diha nga ang tanang paglaum wala na. Dinha Siya sa kasagaran nagaabot. Kita n’yo? Nagaabot Siya diha sa pinaka-mangiob nga oras, dayon nagpakita na si Jesus diha sa esena.

42 Karon bantayi, miabot Siya ug gitawag si Marta. Mihatud og bag-ong mga paglaum ang Iyang Presensiya. Bisan pa nga patay na ang maong batan-on, apan sa gihapon nagdala og bag-ong paglaum ang Iyang Presensiya.

43 Mahimong nagalingkod ka dinhi karong gabhiona, higala ko, kon diin misurender na ang mga doktor kanimo, tungod sa kanser, sakit sa kasingkasing. Tingali anaa ka sa usa ka lingkoranan, nga usa ka bakul, giingon na sa tanang siyensiya nga wala na og paglaum pa para kanimo; ang deposito sa calcium—mao ang nagpabukol sa imo—imo—sa imong mga bukog, nga dili mo na mahimong mapiko pa ang mga niini. O, mahimo nga ang imong—ang kasingkasing mo grabe na kaayo, ginaingon sa doktor nga mahimo kang mamatay unsa mang taknaa. Oh, ug daghang mga tawo nga adunay kanser ug TB, tingali ang katapusang paglaum nga aduna kamo, ug daw sa ginabalibaran na kamo sa doktor. Bisan pa niana, ang maanaa diha sa Presensiya ug pag-ila sa Presensiya ni Jesus Cristo, nagahatag pag-usab og paglaum.

44 Mahimong aduna pa gani makapaghisgot niini diha kanimo. Tingali dili mo pa nadungog kini kaniadto, apan tugoti nga adunay magsulti, “May nahibaloan ako kon diin adunay usa ka iglesia, nagatoo sila sa Dios ug nagaampo sila alang sa mga masakiton,” sa gilayon dayon (ingon nga nakaandam ka na nga mamatay), kita n’yo, nagausbong ang bag-ong mga paglaum. Kanunay na kini nga ingon niana. Sa nianang mangiob nga takna, dinha kasagaran nga adunay tawong makapaghisgot og unsa man mahitungod niini, magahisgot mahitungod kang Jesus. Nagahatud og bag-ong mga paglaum ang Iyang Presensiya.

45 Hinaut nga buhaton Niini ang mao rang butang karong gabhiona, sama sa gibuhat Niini kagabii, sa dihang makita nato ang maong gipanghimatud-an nga Pulong sa wala’y ni anino sa pagduhaduha, nga gipadayag ug gipamatud-an; nga ang kadtong Jesus nga nabuhi dise-nuebe na ka gatus ka tuig ang milabay, nga namatay didto sa Kalbaryo, nabanhaw sa ikatulo nga adlaw, ug nagpakita ngadto sa mga tinun-an ug giablihan ang ilang mga mata, ug naghimo niining saad alang niadtong adlaw, ania mismo karong gabhiona sa atong atubangan karon. Siguradong magadala kini og mga paglaum diha sa mga tawo. Magasidlak ang mga bag-ong paglaum.

46 Tingali adunay moingon, “Daw sa nagakauga na ang iglesia. Wala kita og unsa mang maayong preskong tubig sa—sa—sa pila na ka bulan. Dugay na nga wala kita’y rebaybal. Daw sa ang tanan bug-os nang walay kadasig, o morag ingon-ana. Nagasimba lang kita ug nagakanta og himno, ug—ug nagapaminaw og pipila ka mensahe ug nagapamauli na.” Apan kalit na lang, dayon, sa dihang nagsugod na kita nagakauga, dayon nagaabot si Jesus sa esena, ginapapresko kita, nagadala og usa ka butang nga bag-o alang kanato. Anaa Siya kanunay aron buhaton kana. Nagaabot ang mga bag-ong paglaum kung—kung nagaabot si Jesus. Nagdala og bag-ong paglaum ang Iyang Presensiya.

47 Nasayod si Marta nga si Jesus kadtong nadayag nga Pulong sa Dios. Nakita niya kadto nga kapanahonan. O, kung wala niya nakita, siguro Orthodox sa gihapon siya. Miyembro gihapon siya sa iglesia. Apan nakita niya ang kadtong gisaad nga Pulong. Nakita niya ang kadtong gisaad nga Pulong nga nadayag pinaagi Kaniya ug nasayod siya nga Siya mao kadtong buhi nga Pulong. Ug sa pagkadungog niya bahin niini, wala niya igsapayan kung pila man ang nanaway kaniya, o unsa pa man, midagan siya paingon Kaniya kutob sa mahimo niya. Kita n’yo? Nasayod siya nga Siya ang kadtong nadayag nga Pulong.

48 Walay duhaduha nga nabasa niya ang estorya bahin ni Elias sa iyang mga adlaw. Karon, siya ang nadayag nga Pulong sa Dios niadtong panahona. Usa siya ka propeta, ug nagaabot ang Pulong sa Ginoo ngadto sa propeta. Ug dihay usa ka babaye didto, nga adunay usa ka gamay’ng bata nga gikahatag kaniya

pinaagi sa usa ka panalangin nga gipanalangin kaniya niadtong propeta, ug nanganak siya'g usa ka bata.

⁴⁹ Usa niana ka adlaw, sa mga alas onse, giatake tingali ang maong bata gumikan sa kainit sa adlaw. Atua siya didto sa umahan uban sa iyang amahan, wala ma'y ginaingon ang Biblia nga ingon niana gayud, nga giatake siya gumikan sa kainit sa adlaw, apan nagsugod siyang misinggit, "Ang ulo ko! Ang ulo ko!" Mga alas onse sa buntag. Ug gipaubanan siya sa usa ka sulugoon, sa niadtong amahan, aron makapauli siya. Mihigda kini sa sabakan sa iyang inahan hangtud mga udto na, naggrabe ug nagkagrabe ang sakit, ug sa katapusan namatay.

⁵⁰ Ug karon, imbis nga mawad-an og paglaum, ang... nangabot tanan ang mga kasilinganan nga nagsiniyagit ug kung unsa pa ang gipanghimo, apan ang kadtong lig-on nga inahan, patay na ang iyang anak, gidala niya kini didto sa sulod niadtong gamay'ng lawak nga giandam niya alang sa propeta, ug gipahimutang kini sa higdaanan niini, nga ingon niana. Ug miingon siya sa sulogoon, "Montorahi ang mula alang kanako, ug magpadagan ka nga dire-diretso, ug ayaw paghunong gawas kon magsulti ako kanimo." Oh, grabe! Mao kana!

⁵¹ Wala na kita'y panahon aron makiglantugi pa niana ug pakiglalisan. Kining sa karon lagpas na sa niadto nga adlaw. Padayon kita. Kinahanglan nato nga makaabot didto. May panginahanglan kita.

⁵² Ug busa miingon kadtong inahan, "Magpadayon ka, ug dili mo pahinayon ang imong pagpadagan gawas kon isugo ko sa imo." Ug nangadto sila hangtud nga nakaabot sila kang Elias.

⁵³ Si Elias, ingon nga usa ka tawo sa Dios, dili pareho ni Cristo; nasayod si Cristo sa tanang mga butang, 'kay Dios man Siya. Si Elias usa lang ka tipik sa Dios. Si Cristo kadto nga atua kang Elias. Ug kadto ang mensahe sa iyang kapanahonan, kay ang Pulong sa Ginoo alang niadtong kapanahonan atua sa maong propeta.

⁵⁴ Si Jesus ang kahupnganan sa tanan niadtong mga propeta, gipadayag lamang sa matag usa kanila Siya. Kana lang. Gikan pa kang Joseph, gikan niadtong katloan ka buok nga salapi, bisan asa nga dapit niadto, iyang—iyang ginahulagway si Cristo. Mao usab si Moises!

⁵⁵ Si David, nga atua didto sa bungtod nga usa ka sinalikway nga hari, nagahilak tungod nga gisalikway siya. Walo ka gatus ka tuig human niadto, ang Anak ni David miadto didto sa bungtod. Kadto mao ang Espiritu ni Cristo nga atua kang David didto. Ug Siya... Grabe! Siya ang parehong Gamut ug Kaliwat ni David. Ug busa nga atua Siya didto sa bungtod, nagahilak, ingon nga usa ka sinalikway nga Hari, "Jerusalem, Jerusalem, sa makadaghan nga buot Kong lumluman ka, sama sa usa ka

himungaan nga magalumlom sa iyang mga piso.” Unsa man kadto? Si Cristo kadto nga atua kaniadto.

⁵⁶ Si Cristo kadto nga nagahilak niadtong gisulat ni David ang alawiton, “Dios ko, nganong gibiyaan Mo Ako? Ang tanan Kong mga bukog, nagatutok sila Kanako. Gipalagbasan nila ang Akong mga tiil ug ang Akong mga kamot. Gibahinbahin nila ang Akong mga bisti sa taliwala nila. Sa Akong kupo nanagrifa sila.” Si Cristo kadto nga nagapakigsulti nga atua sa sulod ni David. Husto kana. Siya mao ang kapahayagan sa Pulong. Miabot si Cristo aron sa pagtuman niadtong mga butang nga ginaingon pinaagi sa mga propeta, tungod kay ang Pulong anaa man sa mga propeta.

⁵⁷ Giingon Niya kana sa pagtuon kagabii, nga Siya miabot aron sa pagtuman sa ginaingon sa mga propeta bahin Kaniya, tungod kay atua kanila kaniadto ang Pulong. Ug si Elias propeta sa Dios, ang Pulong sa maong panahon.

⁵⁸ Busa nagpabilin ang Sunamitanhong babaye uban niadtong propeta hangtud nga miabot niadtong propeta ug gipadayag ang gahum sa Dios, ug gipatong ang tibuok niyang lawas sa maong bata, ug nabuhi ang bata.

⁵⁹ Karon siguradong nahibaloan kini ni Marta, bisan og nagkapuliki siya kaniadto sa pag-atiman sa panimalay, pagpanghugas og mga plato, ug uban pa. Apan niadtong tungora gipakita niya ang iyang kolor. Gipakita niya kung unsa gayud ang anaa sa sulod niya. Nagdalidali kini aron adtoon Siya. Kung ang Dios atua kang Elias kaniadto, sigurado nga ang Dios atua kang Cristo, tungod kay gipamatud-an Niya nga Siya mismo niadtong Persona. Amen. Gusto ko kana, ang ingon-anang determinasyon! Giadtoan niya Siya. Kinahanglan niya nga maadtoan Siya. Ug nakaplagan gayud niya, sa dihang natagbo na niya Siya—Siya; karon hinumdumi, nahibaloan niya nga wala gayud Siya nausab, nga wala gayud ginausab sa Dios ang Iyang programa. Kung Siya atua kang Elias kaniadto ug mahimong banhawon ang patay, Siya anaa kang Cristo usab ug mahimong banhawon ang patay, bisan nga wala pa Niya ginabuhat, tungod kay kini ang mao ra nga Dios.

⁶⁰ Ug bisan hangtud karon wala sa gihapon Siya nausab! Mao ra gihapon nga Dios karong gabhiona sama kung unsa Siya kaniadto. Siya mao sa gihapon kagahapon, karon, ug hangtud sa kahangturan. Wala Siya nagabalhin.

⁶¹ Ug nasayod Siya nga nahibalo siya nga kini anaa Kaniya. Bantayi, sa pipila pa lang ka minuto napamatud-an na kini, sa dihang giingon niya ngadto Kaniya ang bahin sa iyang igsoong lalaki, ug miingon siya, “Ginoo, ako—nagatoo ako nga Ikaw mao gayud.”

⁶² Ug miingon Siya, “Ako mao ang Pagkabanhaw ug ang Kinabuhi. Bisan siya mamatay, mabuhi siya. Ang tanan nga buhi

ug nagatoo Kanako dili na gayud mamatay. AKO MAO.” Kana mao si AKO MAO nga atua kaniadto sa nagadilaab nga kahoy’ng talongon, nga kauban si Moises. “Ako mao ang Pagkabanhaw. Ako mao ang Kinabuhi. Ako mao ang Paril. Ako mao sa gihapon Siya. Ako mao ang Pagkabanhaw ug ang Kinabuhi. Ang nagatoo Kanako, bisan siya mamatay, mabuhi siya. Ang tanan nga buhi ug nagatoo Kanako, dili na gayud mamatay.” Human sa niining dakung kasiguradohan nga nabatohan niya, nga Siya mao ang gisaad nga Pulong; sa dihang miingon Siya, ingon nga usa ka Propeta, nga dili Niya mahimong makapamakak; busa Siya, sa dihang miingon Siya, “Ako man ang MAO AKO. Ako mao Siya nga mao ang Pagkabanhaw ug ang Kinabuhi.”

⁶³ Ingon niya, “Nagatoo ako nga Ikaw mao Siya, ang Anak sa Dios nga magaanhi sa kalibutan. Bisan pa og patay na ang akong igsoon, nga nakapahiluna na didto sa lubnganan, siya . . . nagakadugta na ang iyang lawas karon; apan bisan karon, unsa man ang Imong isulti, mahitabo kini.” Husto!

⁶⁴ Ang gusto lamang niyang madungog nga masulti Niya kadto! Amen. Oh, Marta, hain na man kita karong gabhiona? “Isulti lamang ang Pulong; mabuhi gayud ang akong sulogon!” Madungog lang gyud Siya nga masulti niini! Mahimong giadtoan nila siya ug gisultihan siya nga gisulti na Niya kini, apan ania Siya nga Siya Mismo. Oh Dios, ipabuka ang mga nabutang mata, aron nga makakita sila! Sa dihang Siya, sa Iyang Presensiya, magasulti na sa Pulong, kanunay gyud kini nga madayag.

⁶⁵ Miingon siya, “Unsa man ang Imong pangayoon sa Dios, igahatag kini sa Dios Kanimo. Padungga lang ako!” Gusto niya nga Iya gayud isulti ang Pulong. Mao lang kadto ang gusto niyang madungog. Makuha lang ang maong Pulong, kadto lang ang gikinahanglan niya, ang madungog Siya nga moingon nga pagabuhaton Niya kini.

⁶⁶ Ug Iya na unta dayon buhaton kadto, apan, nakita n’yo, tungod sa panan-awon nga gipakita Kaniya sa Amahan, kinahanglan nga nagatindog Siya didto duol sa lubnganan. Oh, my! Kupti lang sa inyong pagtoo! Ang Dios nagapamuhat man sa tanan nga mamaayo. Mamaayo ra kini. Hulata lang nga makaabot siya didto sa lubnganan.

⁶⁷ Himatikdi, mahimo man niya nga kumbinsihon Siya aron isulti kadto, bisan kaniadtong wala pa kini. . . Wala na gayuy paglaum, tanan na. Patay na siya, nga nagakadugta na didto sa lubnganan, apan ang madungog lang Siya nga isulti kadto, mao lang gyud kini ang gusto niya.

⁶⁸ Karon sa dihang misulti Siya, “Ako mao ang Pagkabanhaw ug ang Kinabuhi,” gitooan niya kini. Gitooan niya kini. Karon himatikdi, karon kinahanglan niyang toohan ang mga imposible, sa dihang nadungog na niya Siya nga misulti, “Ako mao ang

Pagkabanhaw ug ang Kinabuhi. Bisan nga siya patay na, mabuhi siya, ug ang tanan nga buhi ug nagatoo Kanako dili na gayud mamatay.” Miingon pa, “Nagatoo ka ba niini?”

⁶⁹ Ug ang tubag niya, “Oo, Ginoo, nagatoo ako niini. Nagatoo ko nga Ikaw mao ang Anak sa Dios nga moanhi gayud sa kalibutan.” Gusto ko kana. Gusto ko kana.

⁷⁰ Ako—ako na kining nasulti kaniadto. Mahimong moaplikar pa kini karon. Nagpakigsulti ako sa usa ka babaye dili pa lang dugay, sa usa kini ka iglesia nga nalakbitan ko kaganina, nga dili nagatoo nga Siya Dios, sa Iyang Pagka-Dios; nga Siya kono usa lang ka propeta, usa ka ordinaryong tawo.

⁷¹ Ingon niana man Siya, sa tinuod lang. Ingon niana Siya, og Dios usab. Kita n’yo, Siya mao ang kapadayagan. Si Jesus mao ang lawas, ang Lalaki, ang Tawo; ang Dios mao ang mipuyo diha sulod Niya. Anaa ang Dios Kaniya. Siya’y Tawong-Dios. Tawo Siya, apan Siya’y Dios nga nadayag sa unod. Pagnakita nato si Jesus, nakita nato ang Dios. Mao kana ang Iyang giingon, “Pagnakita ninyo ang Amahan, nakita ninyo Ako, nakita ninyo ang Amahan.” Tungod kay, Siya mao ang aninag, tungod kay Siya mao ang Pulong, amen, nga didto na sa sinugdanan pa lang. Amen.

⁷² Gitawag Niya ang mga propeta nga, “dios.” Nahibalo ba mo niana? Miingon Siya, “Ginatawag ninyo sila nga ‘dios’ nga kang kinsa nagaabot ang Pulong. Unsaon man ninyo sa paghukom Kanako kon Ako moingon, ‘Ako ang Anak sa Dios?’”

⁷³ Tungod kay, ang mao ra nga Pulong nagsulti man nga maatua Siya kaniadto, ug mao kadto ang naipadayag nga Pulong pag-usab. Ug wala sila sa gihapon mitoo niadto.

⁷⁴ Kini nga babaye miingon kanako, “Mahimo kong pamatud-an kanimo.” Miingon, “Gusto ko nga madungog kang nagawali, apan adunay usa ka butang nga imong ginapasobraan.”

“Bueno, unsa man kana?”

Miingon, “Ginapasigarbo ra kaayo nimo si Jesus.”

⁷⁵ Ingon ko, “Nagalaum ko nga mao lang kana unta ang dili Niya maangayan kanako sa pagbalik Niya.” Ug miingon siya . . . Ingon ko, “Nagalaum ko nga kana lang unta ang mahimo Niya, ang sayup nga mahimo Niyang mahikaplagan kanako.” Miingon ko, “Kung aduna man ko’y napulo ka libo nga mga dila, dili gyud ako makasulti’g igo, oh, my, kung unsa Siya!”

Ingon siya, “Apan, imong, ginahimo mo man Siya nga Dios.”

⁷⁶ Ingon ko, “Kay Dios man Siya. Kay, kung dili, Siya na ang pinakalabing manglilimbong nga nagkaaduna ang kalibutan.”

Ingon siya, “Usa Siya ka propeta.”

⁷⁷ Ingon ko, “Usa Siya ka propeta, tinuod kana: usa ka Dios-nga-propeta, ang kahupnganan sa Pulong. Nagaabot lang sa

propeta ang Pulong diha kaniya, kana ang nakapahimo kaniya—nakapahimo kaniya nga usa ka propeta. Apan Siya mao ang kahupnganan niana nga Pulong.”

⁷⁸ Ug miingon siya, “Mahimo kong pamatud-an kanimo.” Miingon, “Ginahimo mo Siyang Dios.”

Ingon ko, “Siya’y Dios.”

Ug miingon siya, “Dili mahimo nga Siya’y Dios.”

Ingon ko, “Siya . . . Apan Siya’y Dios.”

Ingon siya, “Ingon ka nga nagatoo ka sa Biblia.”

Ingon ko, “Oo.”

⁷⁹ Miingon siya, “Pamatud-an ko kanimo, pinaagi sa imong kaugalingong Biblia, nga dili Siya Dios.”

⁸⁰ Miingon ko, “Sige. Kung nagaingon ang Biblia, nan ako kanang toohan, tungod kay ako nagatoo man nga husto ang Pulong.”

⁸¹ Ingon siya, “Diha sa dalan padulong ngadto sa lubnganan ni Lazarus, nahinumduman mo ba kana sa San Juan 11?”

Ingon ko, “Nahinumdum ko, madam.”

⁸² Miingon, “Bueno, karon, diha sa dalan, mihilak Siya. Ang Biblia nag-ingon, ‘Siya mihilak.’”

Ingon ko, “Oo, ang Biblia miingon nga Siya mihilak.”

Miingon, “Unsaon man Niya nga pagkahimong Dios ug tapos mohilak?”

Ingon ko, “Tawo man Siya.”

“Tawo ug Dios?”

⁸³ Miingon ko, “Oo, gining. Napakyas ka nga makita. Siya’y usa ka—usa ka tawo nga nagpadulong didto, nagahilak uban niadtong mga nanagpanghilak, husto kana, naguol uban niadtong mga nanagkaguol. Usa Siya ka Tawo. Apan sa dihang gitul-id Niya ang Iyang gamay’ng, mahuyang nga lawas, ug miingon, ‘Lazarus, gula ngari,’ ug mitindog, ang usa ka tawo nga upat na ka adlaw nga patay. Labi pa kadto sa usa ka tawo, ang Dios kadto nga anaa sa Tawo.” Si kinsa man ang makapabuhi og patay, kondili ang Dios? Siya mao ang Pagkabanhaw ug ang Kinabuhi! Husto kana.

⁸⁴ Niadtong gabhiona didto sa dagat, sa dihang atua Siya didto, nga gikapoy, naghigda sa luyo sa maong gamay nga sakayan, kon diin nanumpa ang napulo ka libo nga mga yawa nga lumsan nila Siya niadtong gabhiona, ug naglutaw-lutaw kadtong gamay’ng karaan na nga sakayan nga mora og taklob sa botelya didto sa usa ka mabagyohong dagat. Naghunahuna kadtong mga yawa, “Nadakpan na nato Siya karon. Tulog na Siya; i-unlod nato ang tibuk nga sakayan.” Oh, usa Siya ka tawo, nga gikapoy, apan sa dihang nakamata na, gipatong Niya ang Iyang tiil didto sa kilid,

ug mihangad ug miingon, “Humilum, humunong ka,” ug ang mga hangin ug ang mga balod mituman Kaniya. Labi pa kana kay sa usa ka tawo.

⁸⁵ Usa Siya ka Tawo kaniadto sa dihang Siya gigutom, mikanaug didto sa bukid, nagapangita og tinapay o unsa man nga makaon, o usa ka bunga gikan sa usa ka kahoy’ng figuera. Apan sa diha nga gikuha Niya ang lima ka tinapay ug duha ka isda, ug gipakaon ang lima ka libo, ang Dios na kadto nga anaa niadto nga Tawo. Husto kana.

⁸⁶ Oh, ang matag tawo nga dili gani mahisama ang bili sa usa ka pundok sa mga liso nagatoo gayud niana, ang tanang mga magbabalak nagatoo gyud niana. Dili ikatingala nga ang usa kanila misulat:

Sa buhi pa gihigugma Niya ako; ug sa
pagkamatay, giluwat Niya ako;
Pagkalubong, gidala Niya pahalayo ang akong
mga kasal-anan;
Pagkabanhaw, Iyang gimatarung nga walay-
bayad hangtud sa kahangturan;
Moabot Siya sa umaabot nga adlaw, Oh
mahimayaong adlaw!

⁸⁷ Si Eddie Perronet, nga kadtong mga alawiton niya dili niya maibaligya. Usa niana ka adlaw, nga nagasarasay ilalum sa impluwensiya sa Balaang Espiritu, mikuha og usa ka pangsulat, gisulat niya ang pang-inugurasyon nga kanta, sa dihang gisulat niya:

Tanan maghimaya sa gahum sa Ngalan ni
Jesus!
Ang mga Manulonda mangyukbo ug
manghapa;
Ipagawas ang harianong purong-purong,
Purong-purongan Siya ang Ginoo sa tanan!
(Alleluyah!)

⁸⁸ Sigurado gayud, mao kana ang atong ginatoohan kung unsa Siya. Oo, sir.

⁸⁹ Kinahanglan niyang toohan karon ang mga butang nga imposible, sa modernong panghunahuna niadtong adlaw. Busa kinahanglan usab ninyong toohan ang mga imposible, aron makita ang bag-ong Kinabuhi, aron makita ang usa ka butang nga magakahitabo. Apan kung naila Niya . . . Naila niya Siya nga mao ang Pulong, kung ingon niana mamahimo nang mahitabo ang mga imposible, tungod kay Siya man mao ang Magbubuhay, ug pagatumanon gayud Niya ang tanan Niyang gisulti.

⁹⁰ “Ug ang tanang butang mahimo ngadto kanila nga makahimo sa pag-too.” Mao kana ang Iyang Pulong. Apan ang mga imposible magakahitabo ra sa diha ang Dios saligan diha sa Iyang Pulong. Oo, sir. Sa dihang saligan ang Dios diha sa Iyang

Pulong, mahi—mahitabo gayud ang mga imposible. Pagmosulti ang Dios nga mahitabo kini, nan dawata ninyo kana nga Pulong ug bantayi kung unsa, nga mga imposible magakahitabo gayud. Sigurado gyud.

⁹¹ Apan himatikdi, bisan sa tanan niadto, miingon siya, “Bisan karon, Ginoo, bisan unsa man ang Imong pangayoon sa Dios, pagabuhaton kini sa Dios.” Nasayod siya nga kung mahimo lang niya nga maisulti kadto nga Pulong gikan Kaniya. Mao lang kadto ang kinahanglan niyang buhaton, ang mapasulti kadto nga Pulong. Oo, mao kadto ang pinakamangitngit niya nga takna, ug miabot si Jesus ug nagtawag. Oh, daw sa unsa nga butang ang ilang nakita kaniadto, usa ka pagkabanhaw!

Tan-awon nato ang uban pa kon diin miabot ang mga mangitngit nga mga takna.

⁹² Adunay usa ka tawo usa ka panahon niadto, nga ginganlan og Job, nga usa sa mga pinaka-karaan na nga mga propeta sa Biblia. Usa siya ka halangdon nga tawo. Iyang—gihigugma gyud niya ang Ginoo, ug gibuhat niya ang tanan nga nahibaloan niyang buhaton. Ug nagtinguha si Satanas nga salaon siya, busa miingon siya sa Dios usa niana ka adlaw . . . Oo, miingon kaniya ang Dios, diay, “Diin ka ba gikan, Satanas?”

⁹³ Ingon niya, “Oh, mianhi ug miadto lang ug misaka ug mikanaug lang sa yuta.”

⁹⁴ Miingon Siya, “Gipalandong mo ba si Job nga Akong alagad? Walay sama kaniya diha sa yuta. Usa siya ka hingpit nga tawo.”

⁹⁵ “Oh,” ingon niya, “sigurado, ginahatag Mo man kaniya ang tanan, tanan na lang ginabuhat Mo alang kaniya. Oo, usa siya ka halangdon nga tawo. Apan itugyan siya kanako usa ka higayon, pagausabon ko ang dagan sa mga panghitabo. Himoon kong magapasipala siya Kanimo, sa Imong nawong.”

⁹⁶ Miingon Siya, “Dili mo mahimo kana.” Ingon niana ang Iyang pagsalig sa usa ka magtotoo. Ngano man? Wala Siya’y kinutuban. Eternal Siya. Nahibalo Siya sa katapusan sukad pa sa sinugdan. Nasayod Siya nga dili makabuhat si Satanas niini. Kay, Siya mao ang Pulong, nasayod Siya kung unsay pagabuhaton ni Job.

⁹⁷ Karon, hinumdumi, si Job, gipabutohan siya og mga hubag, gipatay ang iyang mga anak, ug gikuha ang tanan nga aduna siya. Nawala ang maayo niyang panglawas. Bisan kadtong mga maglilipay niya unta niadtong sila nagpangabot, ug wala sila’y gihimo kondili gipasanginlan nila siya ingon nga usa ka makasasala sa tago lang. Ug miabot sa punto ang tigulang nga si Job sa kahimtang nga naguol kaayo siya.

⁹⁸ Kinahanglan mong maanaa gayud sa kagul-anan, una. Kinahanglan mong moabot sa usa ka panahon nga anaa ka na sa katapusan niining panaw.

⁹⁹ Miabot na sa katapusang panaw si Job kaniadto, sa dihang miingon siya, “Tinunglo ang adlaw nga gipakatawo ako. Wala unta misidlak ang adlaw kaniadto, ug wala unta midan-ag ang bulan sa kagabhion kaniadto, wala unta gitawag ang mao nga ngalan.” Ug diha sa maong kagul-anan, dayon miabot si Jesus. Mitan-aw si Job didto, ug siya miingon, “Nakita ko ang tawo. Mamatay ang bulak, ug mabuhi kini pag-usab sa tingpamulak. Kung matumba ang kahoy, motindog kini pag-usab pinaagi sa humot sa tubig.” Nakita niya ang tanan sa kinabuhing-tanom nga nangabuhì pag-usab, apan miingon, “Ang tawo mapukan, mabugtuan siya og ginhawa, hain na man siya?” Nasayod siya nga usa na siya ka tigulang nga tawo. Miingon siya, “Mangabot ang iyang mga anak nga lalaki aron magbangutan alang kaniya, ug dili siya mahibalo niini. Oh, nga sa sheol unta tagoan Mo ako, ug ibutang ako sa tago nga dapit, hangtud nga mahupay ang Imong kaligutgut. Unta tagalan Mo ako og usa ka panahon ug takdoan ako og panahon. Nangadto kami. . .” Ug nagpadayon siyang ingon niadto, nga nagapakigsulti. Atua na siya sa katapusan, sa iyang kagul-anan, “Unsa na ma’y mahitabo? Mabuhi ang mga dahon, magabalik sa mga kahoy, mobalik pag-usab ang mga bulak, magausbong balik ang tanang uban pa, apan ang tawo nagakapukan ug nagakabugtoan og ginhawa!” Anaa sa kagul-anan siya kaniadto. Wala siya nasayod kung unsay mahitabo kaniya, ug siya nga ingon niadto ang edad.

¹⁰⁰ Sa dihang nasayran na niya, dayon miabot si Jesus. Gipahangad sa Dios ang iyang ulo ngadto sa kawanangan, ug nakita niya si Jesus nga nagaabot diha sa kaulahiing mga adlaw.

¹⁰¹ Niadtong pinakamangitngit nga takna sa dihang ang iyang asawa miingon, “Tungloha ang Dios ug mamatay na,” apan siya miingon, “Babaye, ikaw nagasulti ingon nga usa ka babayeng buang. Ang Ginoo ang mihatag, ug ang Ginoo ang mikuha, bulahan ang Ngalan sa Ginoo.” Bisan ang iyang asawa gani misalikway kaniya. Gisalikway siya sa iyang iglesia. Gisalikway gyud siya sa tanan.

¹⁰² Sa niadtong mangitngit nga takna, kon diin wala siya nahibalo kung asa siya mopadulong gikan didto, miabot si Jesus. Dayon misinggit siya, “Nasayod ako nga ang akong Manluluwas buhi, ug sa kaulahiing mga adlaw Siya motindog ibabaw sa yuta. Ug bisan pa sa tapos ang akong panit kining lawas malaglag, unya diha sa akong unod makita ko ang Dios, nga Siya makita ko mismo.” Sa niining pinakamangitngit nga takna, dinha dayon miabot si Jesus. Oo, sir.

¹⁰³ Si Moises, para kang Moises, miabot kaniya ang pinakamangitngit nga takna kaniadto sa Israel. Atua siya mismo sa linya sa pangatungdanan; gikahinagbo ang Dios didto sa sampinit, ug miingon, “AKO MAN ANG MAO AKO.” Minaug siya ug nakigsangka sa tanan nang matang sa mga pagsundogsundog ni Jannes ug ni Jambres, nga naningkamot

nga sundugon ang iyang bulohaton. Sa tanan niini, mibarug gyud siya nga matinud-anon sa Dios. Sa kaulahian napatoo niya ang Israel. Ug ania siya nga migawas na sa Egipto, padulong ngadto sa—ngadto sa yutang saad, kon diin miingon ang Dios, “Magasimba ka Kanako sa ibabaw niini nga bukid.” Mao kadto ang Pulong sa Dios. Nasayod si Moises nga kinahanglan niyang moadto niadtong bukira. Amen. Mao man ang giingon sa Dios! Walay Faraon nga mahimong mopatay kaniya. Walay yawa nga mahimong mopatay kaniya. Walay bisan unsa man nga mahimong mopatay kaniya. Moadto gyud siya niana nga bukid. Amen! Alleluyah! Gibati ko ang pagkarelihiyoso. Moadto gyud siya niana nga bukid.

¹⁰⁴ Mao man usab kita sa atong pagpadulong ngadto sa Himaya! Walay bisan unsa man ang makapahunong kanato. Wala, sir. Panghimatud-an gyud sa Dios ang Iyang Pulong. Dili ko igsapayan kon unsa pa’y mahitabo, Iya gyud kining pagabuhaton, bisan pa man. Oo.

¹⁰⁵ Sa pagpadulong na niya, diha mismo sa dalan sa pangatungdanan. Ania siya, nga napalibotan tali sa mga kabukiran. Napaminawan niya ug nadunggan niya ang usa ka pagdahunog nga nagsunod kaniya. Unsa kadto? Mga carro ni Faraon, paduol na; armado, may mga bangkaw ug tanan na, aron gukdon sila ug dugmukon sila. Atua didto ang Dagat nga Mapula, nga mibabag kaniya. Unsa ma’y gibuhat niya? Siya’y nagu- . . . Naguol na siya. Nanagsinggit na ang mga tawo, “Oh, delikado gyud kita niini karon. Patyon gyud kita ni Faraon, pangdunggabon gyud kita sa iyang mga espada. Mangamatay ang atong mga bata dinhi sa kamingawan.”

Mituaw si Moises, “Oh Dios!”

¹⁰⁶ Ug dayon miabot si Jesus diha sa esena. Siya mao ang Haligi nga Kalayo. Husto kana. Minaug siya ug nagpataliwala Siya tali kaniya ug sa maong peligro. Amen. Siya mao ang atong Manlalaban. Siya mao ang Manlalaban, amen, usa ka Tigpataliwala. Atua Siya nagtindog, nagatindog didto; ingon nga kangitngit ngadto sa mga Egiptohanon, ngadto sa mga nanagpadulong aron mosulay sa pagbuhat og usa ka pagpanghilabot niini. Siya sa laing bahin mao ang Kahayag ngadto kanila, nga pagalakwan. Dayon pagkabuntag sa dihang ang hangin misugod sa paghaguros nga makusog kaayo, niadtong gabhiona, dayon unsa ma’y Iyang gibuhat? Miabot Siya sa porma sa Haligi nga Kalayo.

¹⁰⁷ Hinumdumi, nga Siya mao sa gihapon kanang Haligi nga Kalayo. Oo, sir. Sa kaniadtong ania pa Siya ibabaw sa yuta, miingon Siya, “Gikan Ako sa Dios, ug mobalik Ako ngadto sa Dios.”

¹⁰⁸ Ug human niadto sa Iyang pagkamatay, paglubong, pagkabanhaw, ug pagkayab; si San Pablo, diha sa iyang dalan

padulong sa Damascus, naigo siya niadtong Haligi nga Kalayo. Hinumdumi, nga usa siya ka Hebreohanon. Wala unta niya gisulti kining. . . Miingon siya, “Ginoo, Kinsa ba Ikaw?” Dakung G-i-n-o-o, Elohim. “Kinsa ba Ikaw nga akong ginalutos?”

Miingon Siya, “Ako mao si Jesus.”

¹⁰⁹ Amen! Alleluyah! Siya mao ang Sinugdan ug ang Katapusan. Siya ang mao ra sa gihapon. “Sa diriyut lamang panahon ug ang kalibutan dili na makakita Kanako, apan kamo makakita Kanako. Ako magauban kaninyo, bisan pa maanaa kaninyo.” Ang mao ra nga Haligi nga Kalayo, ang mao ra nga Dios nga nagabuhat sa mao rang butang, nga dala ang mao ra nga saad, amen, nga ginapadayag ang Iyang Pulong. “Ako mao ang Pagkabanhaw ug Kinabuhi. Ako mao Siya nga sa Kaniadto, Siya nga mao ang Karon, ug Siya nga Umalabot.” Oo, sir. Oo.

“Ang among mga ginikanan nangaon man ug manna didto sa kamingawan.”

¹¹⁰ Miingon Siya, “Sila, ang matag usa kanila, patay na. Apan, AKO MAN ANG MAO AKO.” Si Moises. . . didto sa nagadilaab nga kahoy’ng talongon, mao kadto ang AKO MAO. Siya sa gihapon ang AKO MAO, dili nga Ako kaniadto; AKO MAO, ang sa karong panahon, sa tanang panahon.

¹¹¹ Nahibaloan nato dinhi niadtong nakulong na si Moises didto, ug minaug ang maong Cristo. Karon, ug miingon ang Biblia nga, nga “Giisip ni Moises ang—ang pasipala nga pagaantuson alang kang Cristo ingon nga labi pa ka dakung bahandi kay sa mga bahandi sa Egipto.” Ang pasipala nga pagaantuson alang kang Cristo! Si Cristo mao ang Pagdihog, ang Logos nga migawas sa Dios. Ang maong Manulonda, ang si kinsa man nga nagabasa sa Biblia nakahibalao nga kadto nga Manulonda mao si Cristo. Ug atua Siya sa kamingawan, ug miabot siya diha sa esena, sa pormang gitooan nga maipadayag Siya. Himaya sa Dios!

¹¹² Nagaabot Siya sa karon diha sa maong porma, ang mao ra nga Cristo, nga nagapadayag Kaniya.

¹¹³ Gisultihan Niya sila nga Iyang pagawason sila. Gibuhat Niya kini. Miabot Siya didto aron barugan ang Iyang Pulong, aron panghimatud-an Kini. Dayon human nga nakaabot na Siya, sama sa Iyang gibuhat pud kang Marta kaniadto, unya nagtawag Siya. Miingon Siya, “Moises, nganong nagatauw ka man nganhi Kanako? Ingna kining mga katawhan, nga padayon kamo.” Niadtong mangitngit nga takna, giablihan ang Dagat nga Mapula ug mingtabok sila, diha sa ilang panaw aron sa pagtuman sa Pulong sa Dios. Oo, sa pinakamangitngit nga takna ni Moises kaniadto, dayon dinha miabot si Jesus. Aduna kita’y panahon karon. . . Ug gitawag Niya si Moises.

¹¹⁴ Gusto namong kuhaon ang inyong pagtagad ngadto sa usa na usab ka gamay’ng tawo. Ang iyang ngalan mao si Jairo. Adunay daghan kaayo kanila sa kalibutan karon. Usa siya ka

magtotoo sa tago lang. Gihigugma niya si Jesus. Nakadungog na siya mahitungod Kaniya. Gitooan niya Siya. Apan, nakita n'yo, human na niyang gipasakop ang iyang kaugalingon sa usa ka organisasyon. Oo. Siya—siya—siya—siya gayud. . . Dili siya makagawas ug ipahayag kini. Gitooan niya kini, apan dili niya mahimong ipahayag kini, busa nakig-uban na siya sa mga dili-magtotoo. Apan gitooan gyud niya kini.

¹¹⁵ Kabalo na mo, pagmaana ang usa ka tawo sa nianang kahintang, usahay ginadala siya sa Dios ngadto sa pagpakigsangka. Dinha sa kagul-anan maipakita nato kung unsa gyud ang kolor nato, kung unsa gayud kita.

¹¹⁶ Busa mao kadto siya, nakapa-miyembro na siya ngadto sa mga dili-magtotoo, ug nakapasakop na siya didto ug gisulat na niya ang iyang ngalan sa maong libro, ug uban pa. Ug usa siya ka sacerdote, ug mao nga siya—dili na gayud siya halos makapagpahayag, tungod kay mao man kadto ang iyang panginabuhian. Busa, apan gitooan niya si Jesus sa gihapon.

¹¹⁷ Usa niana ka adlaw, nagkasakit ang iyang batang babaye. Oh, my. Kaniya, di malilong nga tawo lang siya, nga tawo lang pud. . . mao nga, nagtawag siya og doktor. Miabot ang doktor, giatiman kadtong bata. Nagkagrabe ug nagkagrabe pa ang hilanat sa bata. Wala magdugay miinit na kaayo siya, ug tanan na, misangko ang bata sa punto nga naghimalatyon na. Miabot siya sa kalisdanan. Kinahanglan na niyang mobuhat og usa ka butang. Siya, wala siya kahibalo kung unsay pagabuhaton. Karon nahunahunaan niya, “Kung makaplagan ko lang unta Siya, kon diin man Siya.” Karon wala na siya naghulat hangtud mogabii, sama sa gihimo ni Nicodemo kaniadto, aron magkaaduna og personal nga pagpakighinabi. Panahon na kadto aron maglihok, miabot na ang panahon aron maglihok ug kinahanglan na gyud niyang molihok niadtong tungora.

¹¹⁸ Ug sa hunahuna ko, igsoong lalaki, igsoong babaye, mao ra usab karon. Miabot na ang oras aron maglihok. Miabot na ang oras aron sa pagtoo o dili-pagtoo. Nagaabot kana nga linyang utlanan sa matag lalaki ug babaye. Nagaabot kini diha sa matag anak. Usahay pag-nalabyan mo kana nga linya, usa na lang ka butang ang nahibilin, kana mao ang paghukom, pagnalabyan mo ang tali sa kalooy ug paghukom, pag-nalabyan mo kana nga linya.

¹¹⁹ Hinumdumi, anaa siya sa kagul-anan. Wala na siya mahibalo kung unsay pagabuhaton. Atua didto nagatindog ang iyang mga pari, ang tanang mga rabbi nagaalirong kaniya. Didto uban kaniya ang mga kaigsoonan, didto silang tanan, nagatan-aw sa iyang batang babaye nga duol na mamatay. Atua sa gawas ang doktor, nakakuyugpos ang mga kamot, nagapangurog siya, “Nahatag ko na ang tanang tambal nga nahibaloan ko, ug sa gihapon. . .”

120 Kita n'yo, si Jesus kadto nga nagapamuhat sa tanang panahon. Ginabuhat kadto ni Jesus alang sa usa ka katuyoan, aron ipagawas ang kolor niadtong tawo. Wala magdugay, makita ko siyang ginakuha ang gamay'ng itum niyang kalo ug gisul-ob kini, ginasul-ob na niya ang pang-sacerdote niyang kupo.

“Asa ka moadto?”

121 “Akong . . . Nadungog ko nga atua Siya didto sa suba. Adtoon ko Siya!” Oh, my! Miadto siya!

122 Niadtong orasa sa kagul-anan, kinahanglan niyang magdesisyon: pasagdan ba niya ang iyang anak nga mamatay, o kining nahibaloan niya nga mao ang kapahayagan sa Pulong. Usa siya ka sacerdote, ug nabasa niya ang Pulong, ug nahibaloan niya nga kadto mao ang kapahayagan sa Dios. Ang Dios anaa kang Cristo, nagapasig-uli sa kalibutan ngadto sa Iyang Kaugalingon. Hingsayran niya kana, ug napaingon siya sa maong malisud nga kahimtang. Puede siyang masayup, pasagdan ang iyang anak nga mamatay, o dayag siyang magpahayag. Sa dihang anaa siya sa maong kagul-anan, niadtong panahona pud nga miabot si Jesus. Miadto siya aron makigkita Kaniya. Miingon siya, miingon siya, “Mouban ako Kanimo, unsa man ang Imong isulti.” Ug didto sa dalan, dihay miabot nga usa ka mensahero, nga dala ang masubo nga balita. Gihimo na niya ang iyang pagpahayag, nga gitooan gyud niya Siya. Gitiwalag na niya ang iyang kaugalingon niadtong tungora, ug gipasundayag ang iyang kaugalingon ngadto sa mata sa publiko niadtong mga orasa, nga siya'y usa gayud ka magtotoo kang Jesus.

123 Ug dihay miabot nga usa ka mensahero, miingon, “Ayaw na hasola pa ang si kinsa man, kay namatay na ang imong anak nga babaye. Namatay na siya kagahapon. Patay na siya. Ayaw, ayaw na og sayanga ang imong panahon niini.”

124 Ug, oh, daw sa mahugno ang iyang kasingkasing. Apan mitan-aw siya ug nakita ang kadtong mga mata ni Jesus, miingon, “Dili ba giingon Ko na kanimo? Ayaw kahadlok, kung gusto mong makita ang himaya sa Dios. Unsa ma'y imong gikahadlokan? Gisultihan Ko na ikaw nga moadto Ako.”

125 Giingon na Niya mismo nga moadto Siya. Giingon na Niya mismo nga pagabuhaton Niya kadto, ug ania karon ginabuhat na Niya. Amen. Giingon na Niya nga motungha gayud Siya sa kaulahiang mga adlaw ug buhaton ang kining mga butang sama sa gibuhat Niya kaniadto, sama sa nabasa nato kagabii ug nahisgotan. Ania Siya nga ginabuhat na kini. Unsa ma'y inyong gikahadlokan?

126 Hinumdumi, pag-abot Niya, gitawag Niya ang maong batang babaye gikan sa mga patay. Miabot Siya sa esena ug gitawag siya gikan sa mga patay.

Ang makaluluoy'ng buta nga si Bartimeo, usa ka higayon kaniadto, miabot pud sa pinakamangitngit niyang oras.

¹²⁷ Atua si Jesus didto, may naorganisar kaniadto nga pang-pamahaw nga tigum sa Full Gospel Men didto sa—sa Jerico, ug nakauban Niya si Zaqueo didto. Iya siyang natagbo sa usa ka kahoy, didto sa dalan. Busa sa dihang Siya . . . Bueno, dili nga Siya basta-basta nagaorganisar og unsa man, sigurado ako. Kita n'yo? Busa dayon pagkaadto Niya didto, ug Iyang—Iyang natagbo na siya, mikuyog na Kaniya si Zaqueo.

¹²⁸ Ang makaluluoy'ng buta nga si Bartimeo buta na daan sukad niadtong bata pa siya. Busa nahunahuna niya nga basin didto nga ganghaan mogawas si Jesus, ug mao nga nagpaabot siya. Wala magdugay nakadungog siya og daghang kasaba, ug nagapangagi na ang mga tawo.

¹²⁹ Ug nadungog niya ang sacerdote nga nagaingon, “Hoy! Hoy, ikaw, ikaw nga nagasaka dinha sa nianang bungtod! Tinuod—tinuod—tinuod ba . . . Nadungog namo nga nagbanhaw kono Ka og mga patay. Aduna kami dinhi og usa ka tibuok nga menteryo nga puno gayud sa mga patay. Kung ikaw ang Mesias, kung ikaw mao ang Mesias, umari ka ug pangbanhawa kining mga patay.”

¹³⁰ Kabalo mo, hangtud karon nagapadayon kanang mao ra nga yawa, kita n'yo, diha sa pormang relihiyon, nga susama gayud kaniadto. Kita n'yo?

¹³¹ “Kung ikaw mao ang Mesias, kami . . . nagbanhaw man kaha ka og mga patay; aduna kami dinhi og menteryo nga puno sa mga patay. Umari ka.” Ug, oh, sagulsagol na ang nanggisiyagit didto. May usa nga nagasinggit, “Hosanna sa Propeta!” Ang laing usa nagasinggit og *niini, niana, o uban pa*. Grabeng kagubot!

¹³² Nahunahuna hinoon niining makaluluoy'ng buta nga lalaki, “Oh, wala ko gyud Siya natagbo. Didto man Siya migawas, ug abi ko man og dinhi Siya mag-agi. Napahiluna ako sa sayup nga lugar.” Ug napasiyagit siya. Sa hunahuna niya, “Kung Siya mao ang Pulong, Siya'y Dios; sigurado gyud nga mao Siya.” Busa, “Oh Jesus, Ikaw nga Anak ni David, kaloy-i ako!” Niadtong takna sa kaminghoy, mituaw siya.

¹³³ Karon si Jesus, kung markahan ninyo kini dinhi, atua sa Jerico. Didto sa ginaingon nila nga ginapuwestohan niadtong buta, usa ka gatus pa ug singkwenta ka yarda ang kahalayo niya gikan niadtong ginatindogan ni Jesus. Sa linibo ka daghanon sa mga tawo sa palibot Niya, dili Niya mahimong madungog ang pagpakiluoy sa niadtong lalaki. Dili gayud. Apan nabati Niya kadto. Mihunong Siya.

¹³⁴ Gusto kong mowali, usa sa niining mga gabii: “Ug dayon mihunong si Jesus.” Oh! “Ug dayon miduko si Jesus.” Oh!

¹³⁵ Apan sa dihang mihunong si Jesus, unsa man kadto? Gitawag Niya ang maong lalaki. “Miabot na ang Ginoo. Ayaw

na pagkaluya,” ang giingon sa mga tinun-an, “ginatawag ka Niya. Nagatawag Siya kanimo.” Gitawag siya gikan niadtong kadaghanan.

Mao sa gihapong butang ang ginahimo Niya karon. Mituhop ba kini? Kita n’yo?

¹³⁶ “Miabot na ang Ginoo ug mitawag kanimo.” Ug nagatawag Siya gikan sa—gikan sa pagkabuta ngadto sa kahayag, gikan sa kangitngit ngadto sa kahayag. Ug Iyang gitawag siya, gikan sa kamatayon ngadto sa Kinabuhi. “Miabot na ang Ginoo ug nagatawag Siya kanimo.” Ug sa dihang gitawag Niya siya, gihatag Niya balik kaniya ang iyang panan-aw.

¹³⁷ Ang luoy’ng babaye nga may talinugo, usa niana ka higayon, didto sa bungtod, nagasto na niya ang tanan niyang kuwarta, ngadto sa mga doktor. Siya, sa walay pagduhaduha, nabaligya na nila ang—ang ilang mananap. Nabaligya na nila apil ang—ang umahan, naprenda apil kadto. Nagasto na nila ang tanan nga mahimo nilang igasto sa mga doktor, pero wala ni usa kanila ang nakapaayo sa iyang kahimtang. Mas misamot siyang nagkagrabe ug nagkagrabe. Dili gayud mohunong ang pagdugo. Walay-hunong, misamot pa ug misamot, siya’y nagka-grabe ug nagka-grabe pa.

¹³⁸ Ug usa niana ka adlaw, samtang nagalingkod siya didto nga nagagansilyo, didto sa bungtod kon diin siya nagpuyo, milantaw siya ngadto sa walog, ug nakita niya ang usa ka sakayan nga midunggo. Ang tanan nga tawo didto ningsugod og dagan, “Hosanna sa Propeta!”

¹³⁹ Nadungog na niya ang mahitungod Kaniya. Ang pagtoo nagaabot pinaagi sa pagpaminaw. Karon miingon siya, “Moadto ko didto ug tan-awon Siya sa duol.”

¹⁴⁰ Ug sa paglakaw na niya didto, ug sa una niyang pagkakita sa Pulong sa Dios nga napadayag diha sa unod, may sa kung unsang butang diha sa Iyang pagpanulti ug sa Iyang hitsura, nga naila niya nga Siya gayud kadto. Oo, sir. “Oh, kung makuha ko lang ang Iyang pagtagad sa kung unsa mang paagi, kung mahikap ko lang unta Siya sa kung unsa mang paagi!” Ug misaliut siya sa kadaghanan ug gihikap niya ang Iyang bisti.

¹⁴¹ Karon hinumdumi, dili kadtong tudlo sa maong babaye ang nabati Niya. Dili, sir, tungod kay malawlaw ang bisti pang-Palestino. Ug Siya . . . ilang si- . . .

Miingon si Pedro, “Ang tanan mihikap man Kanimo.”

¹⁴² Miingon Siya, “Apan lahi kini nga paghikap. Gibati Ko nga naluya Ako.”

¹⁴³ Miabot si Jesus didto. Nagasto na sa maong babaye ang iyang kuwarta, ang tanan hurot na; apan niadtong mangitngit nga takna sa dihang dili na mohunong ang dugo, ug ug dili na kini mapahunong sa mga doktor, miabot si Jesus. Ug unsa ma’y

gibuhat Niya? Gitawag Niya siya. Mitan-aw sa palibot hangtud nga hingkaplagan Niya siya, ug miingon Siya, “Aduna ikaw og talinugo, apan mihunong na kini.”

¹⁴⁴ “Siya mao sa gihapon kagahapon, karon, ug hangtud sa kahangturan.” “Miabot na ang Ginoo ug nagatawag Siya kanimo. Miabot na Siya ug nagtawag Siya.” Gitawag Niya siya balik ngadto sa maayo niyang panglawas.

¹⁴⁵ Ang luoyng babaye sa atabay kaniadto, nga atong gihisgotan kagabii, wala na gayu’y paglaum pa. Tingali, gibiyaan na siguro siya sa iyang panglima nga bana, ug bag-o pa lang niyang gikaipon ang pang-unom niadtong gabhiona, ug siya—medyo nagduhaduha pa siya sa lalaki. Sa pagka-moral nga paagi, wala na gyud siya. Gusto unta niya nga mamahimong usa ka tinuod nga gining; siya, sa walay pagduhaduha, dugay na siyang nagabasa og Biblia.

¹⁴⁶ Ug nagaadto siya didto, nagaadto siya didto nga mga alas onse na. Dili siya puede nga moadto sayo sa buntag pag-didto na ang matarung nga mga babaye. Ug ginalukdo nila ang ilang tubig, ug ang mga banga, ug manguli na. Ug busa dili siya puedeng moadto, nga makigsagol uban kanila. Sila, aduna sila og ingon niana nga segregasyon sa kaniadto nga adlaw, dili magsagol ang matarung ug ang dautan kaniadto. Ang mga imoral magpabilin ra diha sa ilang dapit, mao nga dili siya puedeng moadto kauban sa tanang uban pa kanila. Dili pud nila siya tugotan nga moadto. Busa human nga nakasag-ub na ang tanan sa ilang tubig ug nanguli na. . . Miadto siya ngadto mas Maayo pa hinoon.

¹⁴⁷ Ug dayon miadto na siya didto nga lukdo-lukdo kadtong banga diha sa iyang ulo, sa walay pagduhaduha nagpadulong siya didto, nga naghunahuna, “Karon, ang lalaki nga akong giminyoan, o, nga gikadulog ko kagabii, nagduhaduha ko kaniya. Usa siya ka lalaki, apan ang lihok niya kataw-anan kaayo. Ako—wala pa gyud ako makaila kaniya. Wala na gyud ko’y kahigayonan pa. Gisalikway na ako sa katilingban. Ug dili na ko makasimba niadtong mga kasimbahanan, ayaw nila. . . Tan-awa lang sila! Wala ko kahibalo kung unsa na’y buhaton. Anaa na ako sa kalisdanan. Ug dugay ko nang nabasa sa Biblia; nga sigurado, moabot ang adlaw, kana nga Propeta moabot ra diha sa esena. Karon kahibalo ko nga ginapahayag nila nga wala na kono og ingon niana nga butang, ug kono, ‘kadto tingali usa na ka gatus ka tuig nga sayup, ug usa na ka libo ka tuig nga sayup. Dugay na kaming nagapaabot niini sa linibo na ka mga tuig, ug wala gyud kini nahitabo, mao nga wala na namo kini ginahulat karon.’ Ang tanan na lang ingon niana, ‘Oh, dili, aduna na kami og mga iglesia ug uban pa. Wala na kami nagkinahanglan og ingon niana karon.’” Busa nagapaingon siya didto niadtong tungora, nga nagahunahuna.

148 Kabalo mo, paghunahunaon ninyo Siya, kana maoy kon kanus-a Siya nagapakita kaninyo. Sama sa atong nahisgotan kagabii, niadtong didto sila sa ilang dalan padulong sa Emaus.

149 Sa dihang naghunahuna siya niadtong mga butanga, nadungog niya ang usa ka Tawo nga miingon, “Hatagi Ako og mainom.”

150 Unsa man kadto? Sa pinakamangitngit niya nga mga takna, niadtong wala na siya’y maayong dungog. Tingali usa siya ka maanyag nga dalaga kaniadto, nga napasagdan diha sa dalan nga magkinabuhi og ingon niana. Usahay dili kadto sayup sa maong dalagita, sayup kadto sa iyang mga ginikanan, nga pasagdan ra siyang mogawas nga ingon niana. Ug ingon niana siya, tingali nakabuhayhay kadtong mga gagmay’ng pungpong sa iyang buhok; wala gayud siya’y bili, nagkinabuhi, nga kapoy na, ug walay ni bisan usa ang modawat kaniya, sa maong bata, ug siguro adunay dakung sugilanon sa luyo niini.

151 Bisan pa man, nasayod ako og usa ka butang, nga ginabasa niya ang Biblia, ug ginatoohan niya ang Biblia. Ug adunay usa ka gamay’ng binhi nga natisok na diha sulod sa iyang kasingkasing, nga nagaingon, “Kung mahitabo man kini, mailhan ko gyud kini.” Predistinado na siya para niana.

152 Tan-awa ninyo kadtong si Judas nga nagatindog didto ug ginabuhat kadtong gihimo niya kaniadto. Maitum ang hangtud sa kinasuloran sa iyang kasingkasing. Nagadan-ag man ang Kahayag diha sa iyang mga buhat, apan dinha sa kinasuloran sa iyang kasingkasing wala niya Kini gitooan. Ug ania kining maong babaye. . . Kita n’yo, dili makakunsad ang Kahayag sa ingon niadto. Apan ania ang maong babaye, nga nagatoo, gitooan niya Kini, apan maitum ang iyang kinabuhi; sa diha nga miigo na ang Kahayag, gitangtang Niini ang maong kaitum. Apan sa diha nga miigo ang Kahayag sa kadtong usa, bug-os hinoon nga gipaitum Niini kadto.

153 Kita n’yo, gipakatawo kadtong maong babaye alang niadto nga katuyoan. Siya, ingon niya, sa dihang gisulti Niya kaniya kung pila na kabuok bana nagkaaduna siya, siya. . . Unsa ma’y nahitabo? Daw sa nadasig gyud kaayo siya. Anaa siya sa kalisdanan kaniadto. Miingon siya, “Sir, akong naila nga Ikaw usa ka Propeta. Nasayod ako nga pagmoabot na ang Mesias, pagabuhaton Niya kining mga butanga.”

154 Dayon gitawag Niya siya. Giingnan Niya siya dayon. “Ako mao Siya, Siya nga nagapakigsulti kanimo.” Naila niya kadto pinaagi sa Pulong sa Dios. Gitawag Niya siya gikan sa iyang mga kasal-anan, ngadto sa usa ka Kinabuhi. Ug ang ngalan niya anaa diha sa Biblia, ug aduna na siya og Kinabuhing dili mamatay sa karon.

155 Mahimo pud Niya kamong tawgon sa mao ra nga paagi, tungod kay Siya mao man sa gihapon kagahapon, karon, ug hangtud sa kahangturan. Ang . . .

156 Oo, wala na siya'y maayong dungog, apan bisan pa man nahibaloan niya nga aduna Siya niana nga pagpang-ila. Nahibalo siya nga kadto mao gayud ang Mesias. Dayon sa dihang miingon si Jesus, "Ako mao Siya, Ako mao Siya," nahibalo siya nga mao gyud kadto.

157 Usa ka higayon niadto anaa sa bangka ang mga tinunan, nga wala na gayu'y paglaum. May bagyo, nanglakaw sila kaniadto nga wala si Jesus, ug ang bagyo gayud—daw sama lang kadto didto sa balay ni Lazarus. Wala na gayu'y paglaum. Nasudlan na og daghang tubig ang maong karaan na nga bangka. Ug nanagsiyagit ug nanaghilak na sila didto, ug tingali nanag-ampo ug kung unsa na lang, ug nagapangidlap ang kilat, ug napuno na gayud og tubig ang maong bangka, nangatumba na ang mga poste sa layag, nangabali na ang mga bugsay, ug migakus na sila sa usa'g usa nga, nga nanaghilak.

158 Ug sa niadtong pinakamangitngit nga takna, miabot dayon si Jesus nga nagalakaw didto. Apan daw sa anino Siya kon tanawon ngadto kanila. Makahahadlok Siya kon tanawon, nga ingon og usa ka multo, ug nanagsiyagit sila tungod sa kahadlok.

159 Mao kana ang problema sa karon. Nagaabot si Jesus diha sa oras sa inyong mangitngit nga takna, ug nangahadlok kamo Niini. Wala kamo nakahibalo kung unsa Kini.

160 Wala sila nahibalo kaniadto kung unsa Siya. Miingon sila, "Oh, usa kana ka multo!" Nanagpaniyagit sila.

161 Ug dayon gitawag Niya sila, miingon, "Dili kamo managkahadlok, Ako kini." Sa pinakamangitngit nga takna, miabot si Jesus didto, ang ilang Tabang. Ingon niana sa kanunay ang ginabuhat Niya, nagaabot sa pinakamangitngit nga takna. Dayon miabot si Jesus ug gipahayag ang Iyang Kaugalingon, ug miabot ngadto kanila.

Miingon si Pedro, "Kung Ikaw man ugaling, paanhaa ako diha Kanimo sa ibabaw sa tubig."

Ingon si Jesus, "Umari ka."

162 Kabalo ba mo, mga higala? Sa dili madugay moabot Siya alang niadtong mga ania sa niining kaulahiing mga adlaw. Karon, dili ba kini talagsaon nga ang iglesia anaa na pud sa niining mangitngit nga takna pag-usab?

163 Aduna ako'y usa ka butang nga isulti dinhi. Dili kini usa ka doktrina. Igo lang ko nagapropesiya. Kabalo ba mo kung unsay mahitabo? Moabot kini sa usa ka punto, sa dili madugay, timani ninyo kining akong isulti, nga ang tanang mga denominasyon mapugos silang moapil sa Ekuminikanhong Konseho. Kung dili gani sila magpasakop, nan dili sila magkaaduna og

suporta gikan sa maong Konseho. Busa, magkaaduna og usa ka pagboykot, ug wala na'y ni usa ang makasimba sa niini nga mga iglesia, o makasimba sa uban nga mga iglesia; gawas kon aduna kamo og marka gikan sa inyo mismong iglesia, dili kamo makapamaligya o makapamalit. Nakita na ninyo kini kung unsa kini kaniadto, magakahitabo kini pag-usab, usa ka marka ngadto sa mapintas nga mananap. Ug ang iglesia, maamgo nila kini, ang mga tawong espirituhanon.

¹⁶⁴ Ug kamo nga mga Pentecostal, bisan pa man, nasayran ninyo kini. Hinayhinay ninyo kining mabati. Sa diha nga ang inyong mga iglesia, kadaghanan sa mga organisasyong Pentecostal; dili ko na kinahanglan pa nga hinganlan kamo, apan nahibalo kamo karon mismo nga sila, nagapadulong na sila niana. Nasaksihan nila mismo nga padulong na gyud sila niana. Ug pagmahitabo na kana kaninyo, unsa ma'y kinahanglan ninyong pagabuhaton? Kinahanglan ninyong isurender ang inyong pang-ebanghelyo nga pagpanudlo mahitungod sa bautismo sa Espiritu Santo. Kinahanglan ninyong isurender inyong doktrina sa Biblia.

¹⁶⁵ Ug dili kini pagabarugan sa mga miyembro. Mangamatay una ang natawo na pag-usab nga mga Cristohanon. Gipasidan-an na man sila sa Pulong. Nahibalo na sila nga moabot gyud kini nga butang. Oo, sir.

¹⁶⁶ Ug dili ba kini talagsaon? Ug dinha mismo sa niining pinakamangitngit nga takna, dayon nagaabot si Jesus ug ginatawag sila, nga miingon, “Ayaw kamo pagkahadlok. Ako kini. Ako sa gihapon nagauban kaninyo. Ania Ako aron ipadayag ang Akong Pulong.” Kung unsa Siya sa kaniadto, mao ra usab Siya karon. Miingon Siya nga pagabuhaton Niya kana. Oh, my! Miabot na ang Ginoo ug nagatawag kanato.

¹⁶⁷ Daghang masakiton nga mga tawo dinhi, sigurado gayud, nga nagalingkod sila dinhi karon, ug gisultihan na kamo sa doktor nga wala—wala na kamo'y paglaum pa. Tingali anaa na kamo sa pinakamangitngit ninyo nga takna, apan, hinumdumi, miabot na ang Ginoo ug ginatawag kamo.

¹⁶⁸ Ug moabot ang adlaw, moabot ang adlaw, nga moabot ang Ginoo ug pagatawgon ang matag ngalan nga nahisulat diha sa Libro sa Kinabuhi sa Cordero. Kung wala pa ang ngalan ninyo dinha, siguradoha ninyong nahisulat kini dinha karon, kay moabot gayud Siya ug magapanawag. Bisn kadtong mga anaa na sa lubnganan makadungog gani sa Iyang Tingog ug magapamangon ngadto sa Kinabuhi. Moabot gayud ang Ginoo ug magatawag kaninyo. Ug samtang nagapanawag pa Siya karon, tumubag kamo ug mangandam alang niana nga Adlaw, mao'y akong tambag kaninyo.

¹⁶⁹ Ang saad sa niini nga kapanahonan, nagsaad Siya nga moanhi gayud Siya. Ang mga butang nga gibuhaton Niya kaniadto,

pagabuhaton Niya pag-usab, ug karon usab miabot na ang Ginoo ug nagatawag kaninyo.

¹⁷⁰ Iduko nato ang atong mga ulo. Aduna pa ako og unom ka panid dinhi, apan dili ko—dili ko na kini mahisgotan karon. Iduko nato ang atong mga ulo. Nagsaad ko nga papaulion kamo og sayo, ug kinse minutos na ang milabay.

¹⁷¹ Langitnong Amahan, Oh Ginoo, itugot nga mahitabo kini pag-usab. Ang tanan niining mga butang nga gisulti ko, “Miabot na si Jesus ug nagatawag kanimo.” Unsa ma’y ginabuhat Niya sa dihang nagaabot Siya? Nagapanawag Siya. Ug itugot nga mahitabo kini pag-usab, Ginoo. Itugot nga ang Imong Balaang Espiritu moabot sa taliwala sa mga tawo karong gabhiona, ang Ginoong Jesus diha sa porma sa—sa Espiritu. Itugot nga moanhi Siya karong gabhiona ug ipadayag ang Iyang Kaugalingon, ug dayon ipahayag ang Iyang Kaugalingon. Sama niadtong nga tawo kaniadto, daw sa unsa nga mitoo gayud sila, magatoo usab, kami, Ginoo. Adunay mga pipila dinhi, tingali, nga wala pa gayud nagkaaduna niini nga kahigayonan. Nagaampo kami nga Imo kining itugot ngadto kanila pag-usab niining gabhiona. Kay amo kining ginapangamuyo alang sa himaya sa Dios, sa Ngalan ni Jesus. Amen.

¹⁷² Mao kana, igsoong babaye, apan ipadayon lang kana. Okey kana. Ipadayon lang. Oh, magmahilomon gayud, ang tanan.

¹⁷³ Nagatoo ba kamo nga miabot na Siya? Miabot na Siya. Nagapanawag pa ba Siya sa gihapon sa dihang nagaabot Siya? Karon kung motoo lang gyud kamo. Kung motoo lang gyud kamo sa Pulong sa Dios, igatugot kini sa Dios.

¹⁷⁴ Karon tan-awa ninyo, wala na ako’y panahon pa aron sa pagtawag og linya sa pagpaampo. Tawgon ko sila karong gabhiona, dinha, kon itugot sa Ginoo. Miabot na ang Ginoo. Miabot Siya aron tumanon ang Iyang Pulong sa kaulahiing adlaw. Ug kung unsa Siya kaniadto, mao sa gihapon Siya sa karon. Kung unsa man ang Iyang kapadayagan o pagpaila kaniadto, mao ra usab kini sa karon, tungod kay Siya mao ra sa gihapon ang Pulong sa Dios. Nagatoo ba kamo niana? [Ang kongregasyon nagaingon, “Amen.”—Ed.] Ug ang Pulong sa Dios mao’y usa ka Magtutugkad sa mga hunahuna, sa mga katuyoan sa kasingkasing. Ug kung sa unsang paagi nga gibuhat Niya kini kaniadto, sa mao ra usab nga paagi nga ginabuhat Niya kini sa kanunay. Siya mao ra gayud sa gihapon. Kung pagabuhaton Niya kini karon, toohan ba ninyo Siya? Makapahimo ba kini nga toohan ninyo Siya?

¹⁷⁵ Kamong mga anaa dinha karon, palantawa una ako ug tanawon kung aduna ba ako’y nailhan dinha, nga nagalingkod sa kung asa man dinhi, nga akong nailhan.

¹⁷⁶ Ang tanan nga ania, dapit *dinhi*, nga wala makaila kanako, ipataas ang inyong mga kamot; nasayod kamo nga wala gayud

ako og unsa man nga nahibaloan bahin kaninyo, ug kamong mga adunay sakit, ipataas ang inyong mga kamot. Siguro, ang tanan. Sige, karon, magtoo kamo. Magtoo lamang kamo sa tibuok ninyong kasingkasing. Dili magduhaduha. Magtoo lang. Toohi ang Dios.

¹⁷⁷ Hangyoon ko kamo nga magmahilomon gayud, ug manglingkod. Dili na kamo maglakawlakaw pa, palihog lang. Kita n'yo? Kita n'yo? Kamo usa ka—usa ka kalag, lawas, ug espiritu. Ug ang inyong espiritu. . . Ug ang Balaang Espiritu sensitibo gayud.

¹⁷⁸ Pila man ang mga nakahinumdom, daghan nang mga tuig ang milabay, nga ang Balaang Espiritu, niadtong mianhi ako ug gisultihan ko kamo? Sa dihang ginagunitan ko sa kamot ang mga tawo, gisultihan Niya ako nga moabot kini nga pagpangila, ug unya magpadayon? Nahinumdoman pa ba ninyo kini, nahinumdoman n'yo pa ba kadto? Apan miingon Siya, “Kung mapatoo mo lang ang mga tawo kanimo.” Nahinumdoman pa ba ninyo kadtong mga adlawa, daghan nang mga tuig ang milabay? [Nagaingon ang kongregasyon, “Amen.”—Ed.] Kinahanglan ninyong magtoo.

¹⁷⁹ May nakita akong usa ka lalaki, siguro dinhi kadto sa ubang panagtigum, nagalingkod dinha mismo. Ug ang Balaang Espiritu. . . Ginalantaw ko siya samtang nagawali ako. Usa siya ka piang nga lalaki. Nagakratsis na siya. Ug niadtong nagsugod na akong magtawag, miduol si Satanas sa maong lalaki, usa ka maitum nga landong. Ug nakita ko kadto sa akong mismong mga mata. Mitindog ang maong lalaki ug migawas. Hangtud-hangtud na lang piang siya, kita n'yo. Ug busa, siya, naayo na unta siya didto kung nga—nga siya. . . Kita n'yo? Apan, lang, wala gayud ako mahibalo kung ngano. Siguro naminaw lang gyud siya sa kaaway. Apan kung motindog lang kamo ug makita ninyo kadtong mga landong, makita kadtong mga butanga sa ingon-nianang porma, nga ingon niana ang hitsura, ug bantayan ang mga niini kung unsa sila manglihok. Kita n'yo, mamahimo kining. . .

¹⁸⁰ Karon, dili ako makahimo sa pag-ayo. Ang tawo nga nagaingon kaninyo nga mahimo kono niyang ayohon kamo, sayup siya. Giayo na kamo. Apan, kini mao ang pag-ila sa Presensiya ni Jesus Cristo. Karon kung nasayod si Marta kaniadto nga kung mahimo lang niya nga makita Siya pag-usab, maangkon gayud niya ang iyang gitinguha, tungod kay Siya mao man ang nadayag nga Pulong, dili ba nato mahimong toohan sa ingon kadaku karong gabhiona, ang toohan kini? Sigurado, kinahanglan gyud nato toohan. Miabot Siya. Miabot na Siya, miabot Siya diha sa porma sa Espiritu Santo. Mao kana kung Kinsa Siya. Karon pag-ampo lamang kamo.

¹⁸¹ Tan-awa ninyo, dinhi sa ibabaw, kung duna ko'y patindogon dinhi, dinhi mismo sa akong tupad, nga—nga nagaampo; daghan kaayong mga tawo ang nakita ko nga nagaampo, sa tibuok bilding. Bantayi lang ninyo kini. Dili kamo makaingon. "Isulti, Igsoong Branham. . ." Dili, sir. Ako—dili ko mahimo kanang ingon-ana, wala og kalainan kana nga pug-son ninyo akong magdamgo og usa ka damgo. Kita n'yo? Mahimo kang makadamgo. Ikaw, mahimong padamgohon ka sa Dios og usa ka damgo mahitungod kanako, matooan mo kana, apan dili ka makahimo niana nga kinaugalingon mo. Dili ka mahimong mosulti, nga, "Igsoong Branham, magadamgo ako og usa ka damgo mahitungod kanimo karon." Dili, dili mo kana mahimo. Ni mahimo ko nga makakita og usa ka panan-awon. Kon si kinsa man ang nagahatag og damgo kaninyo, kadto mao ang kinahanglan nga mohimo niini. Ingon niana usab sa usa ka panan-awon.

¹⁸² Nakita ko ang usa ka lalaki nga nagalingkod dinhi mismo sa tumoy sa laray, nga may arthritis. Kung motoo siya sa tibuok niyang kasingkasing, pagaayohon siya sa Dios sa maong arthritis. Nagatoo ka ba nga pagabuhaton Niya kini, sir? Ikaw nga nagalingkod dinhi, Mexicano nga lalaki, nga nagalingkod diha sa tumoy sa lingkoranan, magatoo ka ba niini? Sige, sir.

¹⁸³ Ang gining nga nagalingkod sa sunod nimo, aduna siya'y arthritis, usab. Nagatoo ka ba nga ayohon ka sa Dios, gining? (Aduna ba'y paglanog *niini*? Nabalaka ko nga basin dili kini madunggan sa mga tawo.) Motoo ka ba? Sige.

¹⁸⁴ Unsa man usab kanang usa pa ka Mexicana nga gining nga nagalingkod tupad niya? Nagaantus siya tungod sa sakit sa tiyan. Nagatoo ka ba nga ayohon sa Dios ang imong tiyan, gining?

¹⁸⁵ Naangkon niya kini. Pagmakita ko nga nagakunsad kanang Kahayag, nagapasabot kana nga nahitabo gyud kini. Oo. Mao kana. Miigo Kini kaniya. Anaa Kini dinhi, nga nagatuyok-tuyok sa palibot mismo. . . [Blangko nga bahin sa teyp—Ed]. . . mao kana ang nakapaingon niini. Kita n'yo? Pagmakakaplag Siya og pagtoo! Kita n'yo, "Daghan Siyang dili mabuhat nga mga butang didto tungod sa sa ilang dili-pagtoo."

¹⁸⁶ Aniyay usa ka gining nga nagalingkod dinhi nga nagaampo, dinhi mismo. Nahadlok siya. Angay gayud siyang mahadlok. Aduna siya'y kanser, nga nagkagrabe na. Wala ako makaila nimo, apan ang Dios nakaila kanimo. Nagatoo ka ba nga mahimong isulti sa Dios kanako ang mahitungod sa niini nga kanser, o kung unsa man? Tan-aw kanako. Daghan kaayo ang nagaampo dinhi, nakita n'yo, mao kana'y akong ginasulti. Tan-awa kami. Karon, oo, dili ka taga-dinhi, dili kini imong lugar. Gikan pa ka sa usa ka lugar nga gitawag og Porterville, California. Husto kana. Nagatoo ka ba nga mahimong isulti sa

Dios kanako kung si kinsa ikaw? Nakahibalo Siya. Ang imong ngalan mao si Mrs. Wintham. Husto kana. Karon pag-too, ug mobiya na kanimo ang maong kanser. Kung mahimo mong toohan! Mao lang gyud kana ang ginahangyo sa Dios nga imong pagabuhaton. Kung mahimo mong toohan!

¹⁸⁷ Dili ba ninyo ginatoohan kana sa tibuok ninyong kasingkasing? Adunay usa ka tawo sa niining lugar *dinhi*, dili pa ba ka makatoo? Miabot na ang Ginoo ug nagtawag kanimo. Ginatawag Niya ikaw gikan sa kamatayon ngadto sa Kinabuhi, gikan sa balatian ngadto sa maayong panglawas.

¹⁸⁸ Aniyay usa ka lalaki nga nagalingkod sa luyo mismo dinhi, nakaduko ang ulo, nga nagaampo. Wala siya nagaampo para sa iyang kaugalingon, nagaampo siya para sa uban. Para sa usa—usa ka batang babaye. Iyaha kining anak. Nagatoo ka ba, sir? Aduna ka’y problema sa imong bitiis. Aduna ka’y problema sa imong tuhod. Husto kana. Dili mo na kinahanglan nga mohilak pa, Siya kanang anaa sa imong tupad. Anaa sa ospital ang imong anak nga babaye, dili ba? Tuberculosis ang sakit. Mag-too ka. Nagatoo ka ba? Miabot na ang Ginoo ug ginatawag siya. Motoo ka ba, ingon nga iyang amahan? Motoo ka ba? Hinaut nga duawon Niya siya, ug ikaw usab. Hinaut nga mahuman na kini.

¹⁸⁹ Aniyay usa ka batang lalaki, nga medyo tabunon nga bata. Nagaantus siya tungod sa usa ka sakit sa panit, ug hubak, usa ka gamay’ng batang Mexicano, Mexicano’ng batang lalaki nga nagalingkod dinha. Dili siya taga-dinhi. Siya’y taga-San Jose. Nagatoo ka ba, dong? Ang usa pa ka butang, ania usab ang imong amahan nga kauban nimo. Usa siya ka ministro. Husto kana. Nagatoo ka ba nga mahimong isulti kanako sa Dios kung unsa’y ngalan nimo? Makapahimo ba kini kanimo nga maligonon gayud nga motoo? Ang imong ngalan mao si Reuben. Karon mag-too ka. Um-hum. Ang Dios magaayo kanimo sa hingpit.

¹⁹⁰ Miabot na ang Ginoo ug nagatawag Siya kanimo. Oh, makasala, oh, tawo nga masakiton, dili ba nimo makita ang Ginoo nga nadayag diha sa mga tawo, sa taliwala sa mga magtotoo? Mianhi Siya aron pagatawgon ang Iyang matinuohon nga mga anak padulong ngadto sa maayong panglawas. Miabot Siya aron tawgon ang makasasala paingon ngadto sa paghinulsol. Mga tawong namalik sa pagpakasala, mga miyembro sa iglesia, miabot na ang Ginoo ug nagatawag kaninyo.

¹⁹¹ Nagatoo ka ba niini? Nagatoo ka ba niini alang sa imong panginahanglan karon? Kung nagatoo ka, ipataas ang imong kamot, moingon, “Nagatoo ako para sa akong panginahanglan.” Kung ingon-ana pagtindog mo karon ug dawata kini. Miabot ang Ginoo ug nagatawag kanimo. Ug kinsa ka man, unsa man ang imong panginahanglan, miabot ang Ginoo ug nagatawag Siya

kanimo. Siya mao sa gihapon kagahapon, karon, ug hangtud sa kahangturan.

¹⁹² Kadtong gamay'ng babaye miadto siya sa siyudad, ug miingon, "Umari kamo, tan-awa ang Tawo Kinsa mitug-an kanako kung unsa'y problema." Wala kamo nangadto sa siyudad. Nanganhi kamo ug nakita kini, sa kaugalingon n'yo mismo, mao nga mianhi ang Ginoo ug nagapanawag kaninyo.

¹⁹³ Ipataas ninyo ang inyong mga kamot ug dayegon Siya, ug moingon, "Ginoong Jesus, usa ako ka makasasala; pasayloa ako. Usa ako ka backslider; dawata ako balik, Ginoo. Gikinahanglan ko ang Espiritu Santo; pun-a ako. Nagmasakiton ako; ayoha ako. Piang ako; ayoha ako." Mianhi ang Ginoo ug nagapanawag kaninyo. Ipataas ninyo ang inyong mga kamot ug ihatag Kaniya ang pagdayeg. Amen.

¹⁹⁴ (Hatagi kami og gamay'ng tono niini, "I will praise Him, I will praise Him." Kahibalo ka? *I will praise Him*. Nakahibalo ka niana, dili ba?)

Nagatoo ba kamo?

I will praise Him, I will praise Him,
Oh, praise the Lamb for sinners slain;
Give Him glory, all ye people,
For His Blood has washed away each stain.

¹⁹⁵ Gihigugma ba ninyo Siya? Karon di ba gusto gayud ninyong magkanta alang Kaniya samtang ania Siya dinhi? Siya ang Espiritu nga nagapanglihok palibot sa tibuok bilding. Nasayod Siya sa inyong mga kasingkasing, nasayod sa tanan bahin kaninyo. Kantahon nato kini alang Kaniya, sa tibuok natong kasingkasing.

I will praise Him, (ipataas ninyo ang inyong
mga kamot samtang ginahimo ninyo kini),
I... (karon dayegon ninyo Siya)...praise
Him,
Oh, praise the Lamb for sinner slain;
Oh, give Him glory, all ye people,
For His Blood has washed away each stain.

¹⁹⁶ Oh, gining, ikaw nga anaa sa wheelchair, kung motoo ka lamang og dugang pa dinha mismo. "I. . ." Kantahon nato kini sa makausa pa. May ginahulat lang ako.

I will praise Him, I will praise Him,
Oh, praise the Lamb for sinners slain;
Give Him glory, all ye people,
For His Blood has washed away each stain.

¹⁹⁷ Karon samtang ginakanta nato kini pag-usab, lingia n'yo, ug lamanoha ang kamot sa uban, samtang ginakanta nato kini, kantahon ang, "I'll praise Him." Sige, dungan ang tanan karon.

I will praise Him, I will praise Him,
 Praise the Lamb for sinners slain;
 Give Him glory, all ye people,
 For His Blood has washed away each stain.

¹⁹⁸ Oh, higalang makasasala, mahimo bang moduol ka dinhi karon? Pagduol mo ug ihatag Kaniya ang pagdayeg, kamong tanan nga ania dinhi. Kamong tanan nga gustong ipahayag Siya ingon nga Manluluwas. Diha sa Iyang Presensiya, samtang ang mga balaan nagasimba diha sa Espiritu, mahimo bang moduol ka dinhi ug motindog? Moingon, “Gusto kong magpamatuod, karong gabhiona. Gusto kong ihatag Kaniya ang pagdayeg. Gusto kong moduol. Dili ko Siya ginakaulaw. Gusto kong mahibaloan sa tibuok kalibutan nga ginadawat ko Siya ingon nga akong Manluluwas, dinhi mismo samtang ania Siya karon.” Dumuol kamo samtang ginakanta nato kini.

I will praise Him, (mahimo ba kamong moduol?) I will praise Him,
 Oh, praise the Lamb for sinners slain;
 Oh, give Him glory all ye people,
 For His Blood has washed away each stain.

¹⁹⁹ Oh, mao kana, gining, duol ngari. Kinsa pa man ang gustong moduol, sa Presensiya ni Cristo? Duol ka dinhi, igsoong babaye, tindog dinhi.

²⁰⁰ Adunay uban pa siguro dinhi ang gusto Siyang mamahimong Manluluwas nila, karon mismo, nga wala naulaw niini. Miingon Siya, “Kung magakaulaw ka tungod Kanako sa atubangan sa tawo, igakaulaw Ko ikaw sa atubangan sa Akong Amahan ug sa balaang mga Manulonda.” Kung wala ninyo Siya gikaulaw karon, ug gusto ninyo Siya nga mamahimo nga inyong Manluluwas, samtang ania Siya dinhi! Nakita na ninyo Siya. Tuman kini kahingpit, ang Pulong Mismo nga ginapaila Kini. Duol mo ngari samtang nagadayeg ang mga balaan karon. Mahimo bang moduol kamo ngari?

²⁰¹ Panalanginan ka sa Dios, sir. Ania nagaduol ang usa ka tigulang nga babaye, miabot na gayud sa katigulangon. Mahimo bang moduol ka karon?

I will... (kantahon kini karon)... I will
 praise...

²⁰² Husto kana, mga kabantan-onan, anhi na kamo dinhi. Magdayeg lang. Panalanginan ka sa Dios, gining, ingon niana kini. Panalanginan kamo sa Dios, mga kabantan-onan.

... sinners slain;
 Give Him glory, all ye people,
 For His Blood has washed away each stain.

²⁰³ Samtang nagpadulong ang mga ministro sa niining mga tawo karon siguro may uban pa dinha nga buut moduol dinhi?

Backslider, mahimo bang moduol ka, nga moingon, “Gikaulaw ko ang akong kinabuhi”? Ania na Siya. Nagatoo ba kamo kanako nga alagad sa Dios? Ipataas ang inyong mga kamot. Aba, ania gayud si Jesus Cristo sa atong taliwala. Mahimo bang moduol kamo?

Give Him glory... (Mahimo bang moduol
kamo, ihatag Kaniya ang kahimayaan?)...
people,
For His Blood has washed away... .

²⁰⁴ Marta, moanhi ka ba, o magapabilin ka lang ba dinha sa balay nga kauban si Maria? Magapabilin ka lang ba dinha sa kung unsa nga organisasyon, ug nagaingon, “Oh, ang akong simbahan dili nagatoo Niini,” bisan pa nahipadayag na si Cristo? Magpabilin ka lang ba dinha ug moingon niana, o mogawas ka dinha? “Buena, sultihan ko kamo, pag ako na’y... .” Dili. Karon na, kini na ang maong takna. Nagapaibabaw na ang kamatayon diha kanimo, sama kaniadto sa anak nga babaye ni Jairo.

²⁰⁵ Umari ka na karon! Backslider, umari ka na karon. Makasasala, umari ka na karon. Mao na kini ang takna. Miabot na ang Ginoo ug nagatawag Siya kanimo. Nagatawag gyud Siya kanimo. Moingon ka, “Unsaon ko man sa pagkahibalo?” Gigamit Niya ang akong tingog. Kung gigamit Niya ang akong tingog aron isulti ang sakit, mga balatian ug uban pa, wala ba kamo mahibalo nga nagapanawag usab Siya alang sa sala? Panggawas kamo! Umari na kamo karon, tingali’g mao na kini ang katapusang kahigayonan nga magkaaduna kamo.


²⁰⁶ Sa makausa pa, adunay mas daghan unta nga magaduol dinhi, mga higala. Dili ko gusto nga maulawan kamo, nga tawgon kamo sa ingon-niini. Dili kana husto. Kung kamo man usahay... .Kadtong mga Fariseo kaniadto nagdahum sila nga luwas sila, apan dili gyud sila luwas. Ingon-niana usab ang pagdahum ninyo. Umari na kamo karon.

²⁰⁷ Siguradoha gyud! Ayaw, ayaw kamo pagpamasin lang niini. Kung aduna ma’y diyutay’ng pagduhaduha sa inyong hunahuna, ayaw gayud pagpamasin. Umari na kamo karon. Karon na ang panahon, karon samtang abli pa ang Tuboran, samtang ania pa ang Balaang Espiritu. Miabot na ang Ginoo. Kanang diyutay’ng pagduhaduha, mao gyud kana ang ginapaninguhaan Niyang isulti kaninyo, “Nagaduhaduha ka.” I-surrender na kini. Umari na, karon. Nagaanhi ang Ginoo ug nagatawag kanimo. Husto kana, padayon lang sa pagduol, padayon lang gyud sa pagduol.

I will praise Him, I will praise Him, (mahimo
bang moduol kamo ug ihatag Kaniya ang
pagdayeg?)
Praise the Lamb for sinners slain;
Give Him glory, all ye people,
For His Blood has washed away each stain.

²⁰⁸ Karon samtang nagaduol ang mga makasasala, aron dawaton Siya; tugoti lang ang mga tawo nga mohatag Kaniya og pagdayeg, samtang ginakanta nato kini karon. Ipataas ninyo ang inyong mga kamot, magakanta aron dayegon Siya, karon, magdungan ang tanan.

I will praise Him, I will praise Him,
Praise the Lamb for sinners slain!

²⁰⁹ Pagdayeg lang Kaniya! Kamo nga mga tawong ania dinhi sa palibot, pag-ampo kamo, hangyoo Siya nga pasayloon kamo. Mao kana ang pagabuhaton Niya. Miabot na ang Ginoo ug magapanawag kaninyo. Panalanginan kamo sa Dios. 

DAYON MIABOT SI JESUS UG NAGTAWAG CEB64-0213
(Then Jesus Came And Called)

Kining Mensahe ni Igsoong William Marrion Branham, una giwali sa Ingles niadtong Huwebes sa gabii, Pebrero 13, 1964, didto sa Elliott Auditorium sa Tulare, California, U.S.A., gibalhin gikan sa magnetikong teyp rekording ug gipatik nga walay nakulang sa Ingles. Kining Cebuanong hubad pinatikan na ug gipang-apodapod sa Voice of God Recordings.

CEBUANO

©2018 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Pahibalo Bahin Sa Katungod Sa Pagmantala

Ang tanang katungod sa pagmantala iyaha lamang sa tag-iya. Kining basahona mahimong i-print sa printer sa balay alang sa personal nga gamit o sa pagpang-apod-apod, nga walay-bayad, ingon nga usa ka instrumento sa pagpakaylap sa Ebanghelyo ni Jesus Cristo. Kining basahona dili mahimong ibaligya, kopyahon nga pang-dinaghan, i-post sa website, i-store sa usa ka retrieval system, ihubad sa ubang pinulongan, o gamiton sa pagpangayo og mga amot nga walay ginapagawas nga kasulatan nga pagpahanugot gikan sa Voice Of God Recordings®.

Alang sa dugang nga mga kasayuran o alang sa uban pa nga ginapang-apod-apod nga mga materyales, mahimong kontakon ang:

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org